

# পৃথীরাজ

( কবিভূষণ যোগীন্দ্রনাথ বসু মহাশয়ের “পৃথীরাজ” মহাকাব্য  
অবলম্বনে বিরচিত )

শ্রীমহেন্দ্র নাথ গুপ্ত, এম্-এ.

শ্রীগুরু লাইব্রেরী  
২০৪, কর্ণওয়ালিস ষ্ট্রীট, কলিকাতা

প্রকাশক—

শ্রীভুবনমোহন মজুমদার, বি, এম-সি,

শ্রীগুরু লাইব্রেরী

২০৪, কর্ণওয়ালিস স্ট্রীট, কলিকাতা

প্রিন্টার—শ্রীপরাম চন্দ্র ঘোষ

পরাম প্রেস

৫৭-২, কেশব সেন স্ট্রীট, কলিকাতা

৩৫এ গোয়াবাগান লেন

কলিকাতা

রবিবার—২৪-৯-৫০

## শ্রীমহেন্দ্র নাথ ঙুঙ

পি১৮৩, কানীপুর টাংপুর ওপেন্ স্পেস, টালা—কলিকাতা  
মহাশয়,

আমাদের স্বর্গত পিতৃদেব কবিভূষণ যোগীন্দ্রনাথ বসু মহাশয় বিরচিত “পৃথ্বীরাজ” মহাকাব্য অবলম্বনে আপনি একখানি নাটক রচনা করিতে ইচ্ছা করিয়াছেন জানিয়া আমরা আনন্দিত হইলাম। একথা বলা বাহুল্য যে, মহাকাব্যকে নাটকে রূপান্তরিত করিতে হইলে বহুস্থানে পরিবর্তন, পরিবর্জন, পরিবর্জন প্রভৃতি আবশ্যিক হয়। আপনি আপনার ইচ্ছামত উক্ত মহাকাব্যের যে কোন অংশ গ্রহণ, পরিবর্জন বা পরিবর্জন করিতে পারেন এবং নূতন দৃশ্যাদি সংযোজনা করিতে পারেন। তাহাতে আমাদের কিছুমাত্র আপত্তি নাই। উক্ত নাটক মঞ্চ অভিনীত করাইবার এবং পুস্তকাকারে প্রকাশিত করিবার পূর্ণ সম্বন্ধ আপনাকে থাকিবে। তবে পুস্তকাকারে প্রকাশিত করিলে “কবিভূষণ যোগীন্দ্রনাথ বসু মহাশয়ের পৃথ্বীরাজ মহাকাব্য অবলম্বনে বিরচিত” এই কথাটি পুস্তক মধ্যে সংযোজনা করিবেন এবং রচনামঞ্চে অভিনয়ের বিজ্ঞপ্তিতেও আপনার সুবিধা অনুযায়ী উক্ত কথা কয়টি উল্লেখ করিলে আনন্দিত হইব। আপনার রচিত নাটকের মাধ্যমে “পৃথ্বীরাজ” মহাকাব্যের বহুল প্রচার হইবে এই আশাতেই আমরা উহার নাট্য রূপান্তর করণের এবং অভিনয়ের পূর্ণ সম্বন্ধ আপনাকে অর্পণ করিলাম।

—ইতি বশব্দ

স্বাঃ সুনীল কুমার বসু

স্বাঃ শুভেন্দু কুমার বসু

বঃ সুকুমার বসু

স্বাঃ সুরেন্দ্র কুমার বসু

স্বাঃ সুনীল কুমার বসু

বঃ সুনিত কুমার বসু



## প্রথম অভিনয় রজনীর শিল্পীবৃন্দ

পৃথ্বীরাজ	শ্রীমহেন্দ্র গুপ্ত
মহম্মদ ঘোরী	» মিহির ভট্টাচার্য্য
গোবিন্দ রায়	» অজিত বন্দ্যোপাধ্যায়
জয়চাঁদ	» সন্তোষ দাস
জাহান্দার	» আশু বোস
মৈনুদ্দিন	» পঞ্চানন বন্দ্যোপাধ্যায়
কুতবউদ্দিন	» সত্য পাঠক
হাম্জবী	» চন্দ্রশেখর দে
চাঁদকবি	» কালিপদ চক্রবর্তী
তুঙ্গাচার্য্য	» গোপাল ভট্টাচার্য্য
শঙ্কর মিশ্র	শ্রীমুরারী মুখোপাধ্যায় (বাণীবাবু)
সমরসিংহ	» রবি রায় চৌধুরী
নরসিংহ	» শান্তি দাশগুপ্ত
ভাট	» পশুপতি রক্ষিত
জয়চাঁদের মন্ত্রী	» পতিতপাবন মুখোপাধ্যায়
রাজগণ	{ » উমাপদ বসু
	{ » বিষ্ণু সেন
	{ » হরি প্রসন্ন ভট্টাচার্য্য
সৈনিক	» বলাই গড়াই
মেঘা	সঙ্গীত সত্রাজী ইন্দুবাল
সংযুক্তা	শ্রীমতী ফিরোজাবালা দেবী
শহেলীবাঈ	» পূর্ণিমা দেবী
রাণী মলয়াবতী	» বন্দনা দেবী
রাজমাতা	» বীণা ঘোষ
প্রিয়ব্রতা	

## চরিত্র লিপি

:: পুরুষ ::

পৃথ্বীরাজ	দিল্লী অধীশ্বর
গোবিন্দ রায়	ঐ ভ্রাতা
চাঁদবরদাই	ঐ কবি
ভূঞাচার্য	ঐ গুরুদেব
সমরসিংহ (চিতোরের রাণা)	ঐ ভগ্নীপতি
জয়চাঁদ	কণোজ অধীশ্বর
মহম্মদ ঘোরী	গজনীর সুলতান
কুতবউদ্দিন	ঐ সেনাপতি
হাম্জবী	
মৈনুদ্দিন ( সাধু )	ঐ সঙ্গী
শঙ্কর মিশ্র, পুরোহিত, জয়চাঁদের মন্ত্রী, ভাট, নরসিংহ, জাহান্দার, রাজাগণ, সৈন্যগণ ইত্যাদি ।	

:: স্ত্রী ::

রাণী মলয়াবতী	জয়চাঁদের স্ত্রী
সংযুক্তা	জয়চাঁদের কন্যা
প্রিয়ব্রতা	সংযুক্তার সখী
রাজমাতা	জয়চাঁদের মাতা
শহেলীবাঈ	নিখ্যাতিতা ভারত নারী
মেঘা	ডাকিনী

সুলতানা, নর্তকীগণ ইত্যাদি ।

# স্বর্গীনারাজ

## প্রথম অঙ্ক

### প্রথম দৃশ্য

গজনী । প্রাসাদ কক্ষ । জাহান্নার এবং নর্তকীগণ ।

#### গান

নও জোয়ানী, নয়ন তোলো বেদন তোলো

মোহ আধি নীর,

গোপন হিয়ার আগল ভাঙা যগন রাঙা

এলো মুশাক্কিরু ।

চাঁদনী রাতের ওড়না পরো চাঁদের জোছনা

কাজল মেঘের সুরমা আঁকো

অরুণ লোচনা ।

বাজুক বীণা বাজুক বেণু

লাজুক ফুলের গন্ধ রেণু

গড়ুক বরে আতর সম

বিধুর হিয়ার আতর দানীর ।

জাহান্নার । আহা খেমোনা, খেমোনা ! ইরাণ, তুরাণ, কুম, নানা  
বেশের হরেক রকম রঙীন পাখী, এই গজনী নগরে উড়ে এলোছো !  
এলোছো যদি তো নীরব খেকোনা ! এলো এলো, কল-কাকলী কর,  
সুরের আর গরাদের রঙে নীল শিরা আশমান লালে লাল হোরে  
হাঁক—

( কুতবউদ্দিনের প্রবেশ )

কুতব। আহান্দার !

আহান্দার। আইয়ে আইয়ে মেরা দোস্ত জনাব কুতবউদ্দিন আইবেক্। ওগো, ফিন সুরু লে—

কুতব। আঃ একি হচ্ছে আহান্দার !

আহান্দার। কেন, নানান দেশের এই সব বাদশাহী ভেট এলো, একটু ফুর্তি চলবে না দোস্ত ?

কুতব। না, সুনন্দরীগণ, তোমরা বাইরে ওই গীশ মহলে অপেক্ষা কর।

[ নর্তকীদের প্রস্থান

আহান্দার। যা বাবা ! চিড়িয়া উড়িয়ে দিলে !

কুতব। চিড়িয়া যদি না ওড়াতুম তাহলে একটু বাজে তোমার আন্ উড়ে যেত !

আহান্দার। আন্ উড়ে যেত ? কে ওড়াতো ?

কুতব। এই গজনীনগরের বিনি ভাগ্যবিধাতা সেই সাহাবুদ্দিন মহম্মদ ঘোরী। তাঁরই প্রাসাদে বসে সরাব ও সুনন্দরী নিয়ে তোমার এ ঐক্য তিনি নিশ্চয়ই বরদাস্ত করতেন না।

আহা। কিন্তু তিনি তো আজ এক পক্ষকাল নগরের বাইরে বিজ্রোহ দমন করতে গেছেন। তাঁর প্রতিনিধি এখন তো তুমি !

কুতব। না, তিনি নগরে ফিরে এসেছেন !

আহা। ফিরে এসেছেন !

কুতব। শুধু ফিরে আসেননি, জরুরী পরামর্শের জন্য আমাকে, কোরাম উলমুলুক হামজবীকে এবং লাহু খাজা মৈনুদ্দিন চিত্তিকে অবিলম্বে সমবেত হতে বলেছেন—এই কক্ষেই...

আহা। এই কক্ষেই !

কুতব। চূপ, ওই বৃষ্টি তাঁরা এলে পড়লেন ! পালাও.....

[ আহান্দারের প্রস্থান

তাইতো, রাজধানীতে পদার্পণ করেই অকস্মাৎ এ অকস্মী পরামর্শ-সভা আহ্বান—এর অর্থতো বুঝতে পারিছিনা ! হজরতের আদেশে বৎসরাধিক কাল ছদ্মবেশে ভারতবর্ষ পরিদর্শন করে এলুম—শুধু আমি নই, সেখানে গিয়েছিলেন ওই সাধু মৈমুদ্দিন চিতি, গিয়ানুদ্দীন হামজবী সাহেব । স্বদেশে ফিরতে না ফিরতেই আবার কি ভারতবর্ষ হতে আরো কোনো দূরতর দেশে যাবার অন্ত এই আকস্মিক আহ্বান ! যাক...যেখানে যেতে হয় যাবো । সামান্য ক্রীতদাস ছিলাম, সাহাবুদ্দিন মহম্মদ ধোরীর অনুগ্রহে আজ আমি তাঁর একজন প্রধান সেনানী ! প্রভুর তুষ্টি সাধনই আমার জীবনের একমাত্র ব্রত !

( মহম্মদ ধোরী, মৈমুদ্দিন চিতি ও হামজবীর প্রবেশ )

মহম্মদ । এই যে, সবার আগে এসেছ কুতুব !

শোনো বন্ধু, হামজবী, সাধু মৈমুদ্দিন,

তোমরাও শুন দৌহে যে কারণ করেছি আহ্বান !

আমারি আদেশে হিন্দুস্থানে এতদিন

ছদ্মবেশে আছিলে সকলে !

সেই হিন্দুস্থান সন্মৈত্রে দেখিব নিজে বাহু জাগিয়াছে ।

তার পূর্বে বল সবে

কেমন সে দেশ ; সম্পদ বিভব,

লোকের প্রকৃতি, ধর্ম, যা কিছু দেখেছ,

বিস্তারিয়া বল সবে ! হে কুতুব, আগে বল তুমি ।

কুতুব । জাঁহাপনা ! অদ্ভুত, অপূর্ব দেশ সেই হিন্দুস্থান !

বিশ্বঅষ্টা যেন সৌন্দর্য্যে মাধুর্য্যে তারে নিরূপম করি

গড়েছেন ধরা মাঝে ! সুনীল আকাশ

সমুজ্জল দিবা ভাগে তপন কিরণে ।

জ্যোতির্ষ্মর নিশাকালে স্নিগ্ধ চন্দ্রালোকে ।

তুবার ঝটিকা না জানে সে বেশে কেহ !  
 মধুর পবন বহে সেথাঃঃসংবৎসর,  
 শ্রোতস্বতী যত অমৃত-নলিলে পূর্ণ।  
 কোথা গিরি সুমহান, কোথা বনভূমি,  
 কোথাও বা উপবন বিহঙ্গ কুজিত।  
 সে অপূৰ্ণ বেশে খনি গর্ভে অন্নে মণি,  
 লাগরে মুকুতা, মারী সেথা চির নিক্রপমা।  
 কি কব অধিক শ্রেভু,  
 স্বর্গ স্বর্গ বলে লোক, মম অমুমান,  
 স্বর্গ সেই পুণ্য হিন্দুহান।

মহম্মদ । ভাল, ভাল, কিন্তু হেন স্বর্গ হতে  
 কি কারণ এত শীঘ্র আনিলে ফিরিয়া ?

কুতব । আঁহাপনা ! আনিলাম পথ দেখাইতে  
 সঙ্গে পুণঃ বাব বলে !

মহম্মদ । হঁ, কি তুমি দেখেছ, এবে, বল হামজবী ?  
 কোন বেশে ছিলে সেথা ?

হামজবী । যৌনি নর্যানীর বেশে ! করেছি ভ্রমণ  
 তীর্থে তীর্থে, গ্রামে গ্রামে নগরে প্রান্তরে !  
 বেধিরাছি রাজা, প্রজা, ব্রাহ্মণ, ভ্রমণ !  
 অহুত তাদের ধর্ম, কেহ পুছে শিলা,  
 কেহ নদী, কেহ তরু, কহে কোন জন  
 'অহিংসা পরমধর্ম', আবার কেহ বা  
 নৃত্য করে নরবলি করিয়া প্রদান।

মহম্মদ । নরবলি ?—

হামজবী । শুধুই কি ভাই ? মুক্তি লাভ তরে  
 কেহ ডবে নদী অঙ্গে, গিরিশ্রম হতে,

পড়ে কেহ লক্ষ দিয়া, রথচক্র তলে  
 হয় কেহ নিম্পেবিণ্ড, বন্ধে বিঁপে শূল,  
 বিদারে রসনা বাণে। নির্দম নিষ্ঠুর,  
 পুত্রে ঘের ভালাইয়া সাগরের অলে,  
 বন্ধ করে বালিকারে চিতাকাঠে বাধি  
 তার মৃত পতি সনে, বাজার দামাধা,—  
 যদি করে আর্জুনাদ।

মহম্মদ। অদ্ভুত এ রীতি !

হামজবী। বলে সবে হিন্দু মোরা, কিন্তু পরম্পর  
 জাতি ধর্ম ঘেব, নিত্য রত বিসংবাদে।  
 উচ্চবর্ণ যদি—চামার চণ্ডাল আদি  
 হীন জাতি নরে—স্পর্শে কতু  
 স্নান করি শুচি হয় তবে !  
 নহে বুদ্ধিহীন তারা, তর্কে স্ননিপুণ,  
 রচিয়াছে বহু গ্রন্থ। কিন্তু নাহি জানি  
 কেন হেন মতি ভ্রান্ত তবু।  
 সনৈস্ত্রে চলুন প্রভু ঘরা হিন্দুস্থানে ;  
 মুসলীম সমাজে, ধার্মিকের বহু এক জাঁহাপনা বিনা  
 কেহ নাই এই অনাচার যে বা করিবে উচ্ছেদ !

মহম্মদ। নীরব কি হেতু তুমি মাধু মৈমুদ্দিন ?  
 তোমার কি মত ?

মৈমুদ্দিন। জাঁহাপনা, মত্য বটে  
 হিন্দুস্থান সম দেশ নাহি এ ধরায়।  
 কিন্তু যে কলীর শিরে থাকে মহামনি,  
 হস্ত তার বিবে ডরা। নিরখি তাহের বলবীর্ঘ্য

বুঝিয়াছি বীর হিন্দু জাতি,  
 দুর্কর্ষ সময় ক্ষেত্রে ! বুঝিয়াছি আরও  
 ধর্মপ্রাণ হিন্দু, হোক ধর্ম তাহাদের  
 ভ্রমাত্মক, তবু প্রাণ দিবে তার তরে ।  
 প্রজা সেথা রাজভক্ত, রাজার আদেশে  
 অনলে গরলে জলে না ডরে মরিতে ।  
 আছে জাতিভেদ সত্য, কিন্তু হিন্দু নামে  
 এক সূত্রে বাঁধা হবে । না বুঝে, না ভেবে  
 হিন্দুস্থান আক্রমণ উপযুক্ত নয় ।

মহম্মদ । লভিয়াছ অভিজ্ঞতা রহি হিন্দুস্থানে ।  
 বল শুনি তাহাদের সময় কৌশল ।  
 অশ্ব, গজ, পদাতিক শিক্ষিত কেমন ?  
 অসি, খুল, ধনুর্কাণ, কোন অস্ত্রে পটু তারা ?

মৈনুদ্দিন । হিন্দু বলী গজ বলে ।  
 সচল পর্বত সম গজযুথ হবে  
 হয় বুঝে অগ্রসর, নাহি শক্তি কারো  
 রোধিতে তাহাদের বেগ ; প্রতিদ্বন্দ্বী সেনা  
 চূর্ণ হয় দণ্ড মাত্রে । দেখিয়াছি আরও  
 পরক্ষেপে অধিতীর হিন্দু পদাতিক,  
 অব্যর্থ সন্ধানী হবে । বিশ্বাস আমার  
 না পারিবে মুসলমান আঁটিতে হিন্দুরে  
 গজে পদাতিক সৈন্তে !  
 আঁহাপনা নিজে পরাক্রমে দ্বিতীয় রুস্তম,  
 করুন যা উচিত এখন ।

মহম্মদ । কুতব,  
 হিন্দুস্থান আক্রমণে তোমার কি মত ?

- কুতব। বীরভোগ্যা বসুন্ধরা।  
 এ হেন সম্পদ, এ সৌন্দর্য্য ভোগ যদি  
 পুরুষ হইয়া না করিলু, বুথা অন্য অবনী মণ্ডলে!
- মহম্মদ। সত্য, কিন্তু গুনিলে তো—  
 ছুর্কর্ষ সমরে হিন্দু। না করি বিচার  
 উচিত কি যুদ্ধারম্ভ তাহাদের সনে?
- কুতব। না করি বিচার কখনো কর্তব্য নয়।  
 কিন্তু জাঁহাপনা, দেখুন বারেক ভাবি,  
 বালক কাসিম করেছিল অয় যবে এই হিন্দুগণে  
 লাহল, বীরত্ব কোথা ছিল তাহাদের?  
 অষ্টাদশ বার বীর সুলতান মামুদ  
 লুণ্ঠিগা হিন্দুর দেশ, ভাঙ্গিলা মন্দির,  
 বিচূর্ণিলা মোমনাথ—কোথা ছিল তবে  
 হিন্দুর বীরত্ব? হিন্দু নহে বীর্য্যহীন সত্য,  
 কিন্তু অন্ধপ্রায় ভ্রমে কুসংস্কারে।
- হাম। জাঁহাপনা, আমিও তাহাই বলি।  
 জানে প্রাণ দিতে হিন্দু, কিন্তু নাহি জানে  
 শৃঙ্খলা, সময় নীতি।  
 না জানে পুরুষকার, দৈব দৈব করি  
 নয়ন থাকিতে অন্ধ। হুঁচটে হাঁচিতে  
 কাক শৃগালের রবে গণে পরমাদ।  
 গুনিয়াছি আছে লেখা শাস্ত্রে তাহাদের  
 স লমান হিন্দুহান আক্রমিবে যবে  
 হবে তারা পরাজিত, সাত্রাজ্য তুর্কির  
 প্রতিষ্ঠিত হবে সেথা। হিন্দু শাস্ত্র-ভীরু,

আছে চিন্তাব্রিত হয়ে। প্রবেশিলে মোরা হিন্দুস্থানে  
নিরাশার হবে পদানত।

নাহি চিন্তামাত্র প্রভু,—জিনিব নিশ্চিত মোরা,  
জিনিব হিন্দুরে।

মহম্মদ। সকলের অভিমত করিহু শ্রবণ ! এইবার  
শুন তবে মম আকিঞ্চণ ;  
আমি চাই হিন্দুস্থানে সাম্রাজ্য স্থাপন।  
হে কুতব, রণসজ্জা সংগ্রহের  
সর্ব ভার দিলাম তোমারে। এই মাত্র শুনিলে তো  
গজমৈত্রে পদাতিকে হিন্দু বলদান,  
কিন্তু তাহে কোন চিন্তা নাই,  
রণক্ষেত্রে মস্ত গজ ঘটায় বিপদ  
শত্রু মিত্র উভয়ের। পায় যদি ত্রাস  
না মানে অক্ষুণ্ণ, দুই পক্ষে সমভাবে করে বিদলিত।  
পদাতিক শ্রান্ত হয় রণক্ষেত্র যদি  
হয় দীর্ঘ সুবিস্তৃত। অথ আমাদের  
পরিশ্রমী, দৃঢ়কায়, তুষ্টি অল্লাহারে ;  
উল্লঙ্ঘনে, লস্তুরণে, গিরি আরোহণে  
সুদক্ষ, অভ্যাসগুণে। অশ্ববলে মোরা  
গজ পদাতিক ছই করিব বিজয়।  
কর আয়োজন ত্বরায়, বুঝিলে সময়  
শ্রোন যথা পড়ে গিয়া কপোত মাঝারে  
পড়িব হিন্দুর দেশে !  
শত জাতি, শত ধর্মে বিভক্ত সে দেশ  
সুনিশ্চিত পদানত হইবে মোদের।

কুতব । যথা আজ্ঞা আঁহাপনা ।

মহম্মদ । যাও তবে, লভগে বিশ্রাম ।

[ কুতব ও হামজবীর প্রস্থান

সাধু মৈমুদ্দিন,

শয়নে স্বপনে কিম্বা আগরণে মোর

আজি হতে একমাত্র লক্ষ্য হল

ওই সে ভারতবর্ষ ! ওই সে ভারত ।

( নেপথ্যে শহেলীর গান শোনা গেল... )

মহম্মদ । ওকি, কে গাহে গান ?

মৈমুদ্দিন । ভারতবর্ষের এক অভাগী বালিকা,

আচরণে তার জ্ঞান হয় বুঝি উন্মাদিনী,

ভারত হইতে নিজে

যম সনে স্বইচ্ছায় এসেছে হেথায় !

এবে পুনঃ সে ভারতে ফিরে যেতে চায় ।

মহম্মদ কেন ?

মৈমুদ্দিন । বিচিত্র রহস্যময়ী অদ্ভুত বালিকা,

সংসার বিরাগী সাধু, রমণী চরিত্র

মোর কাছে চিরদিন অতীব দুঃখের ।

প্রাসাদে এনেছি তাই, আঁহাপনা দেখন বালারে ।

মহম্মদ ওই আসে হেথা, চলে এসো মৈমুদ্দিন,

অন্তরাল হতে রমণীর আচরণ লক্ষ্য করি মোরা ।

[ উভয়ের অন্তরালে প্রস্থান

( গান গাহিয়া শহেলীর প্রবেশ )

## গান

আমার ভারত সোনার ভারত  
 ধেয়ানে রচিত ছবি,  
 হিয়া করে আলা নব চাঁদমালা  
 ললাটে অরুণ রবি ।  
 কাল কুন্তল শ্রামল বনানী  
 বিকচ কুমুম হার  
 তুবার মৌলী স্তন গিরি হতে  
 বহে নদী ক্ষীর ধার ।  
 ছয় ঋতু তব ছয় সেবাদাসী  
 প্রগতি জানায় পদতলে আসি  
 পুলক শিহরে আঁখি জলে ভাসি  
 পূজিছে শতেক কবি ।

শহেলী । না না, এ আমি কি গান গাইছি ! 'ভারতের বন্দনা  
 গান, কেন আগে আমার কণ্ঠে ? না, না, এ গান আমি আর গাইব না,  
 জীবনে গাইব না ।

( মৈনুদ্দিন ও ঘোরীর পুনঃ প্রবেশ )

মৈনুদ্দিন । মা—

শহেলী । কে ! ওঃ ফকির সাহেব ? তুমি ? আমার ভারতবর্ষে  
 পাঠাবার ব্যবস্থা করবে বলেছিলে—কিন্তু কই আজও তো আমার  
 ভারতবর্ষে পাঠালে না ? তুমি কি আমার পাঠাবে না সেখানে !

মৈনুদ্দিন । অধীর চয়ো না মা, ভারতে পাঠাব বলেই আজ  
 তোমায় নিয়ে এসেছি এই প্রাসাদে ! তোমার ভারত যাত্রার সব  
 ব্যবস্থা করে দেবেন এই ইনি ।

শহেলী । কে ! তুমি—তুমি—

মৈনুদ্দিন । ইনি গজনির অপৌত্র সাহাবুদ্দিন মহম্মদ ঘোরী—

শহেলী । ওঃ, তুমিই তবে এদেশের রাজা, তুমিই তবে বাদশা !

মহম্মদ । তুমি কে বালিকা ?

শহেলী । আমি শহেলীবাজী—

মহম্মদ । শাহেলীবাজী । সুন্দর নাম । তোমার জাতি—

শহেলী । আমি হিন্দু...

মহম্মদ । হিন্দু ?

শহেলী । না না, আমি মুসলমান । না মুসলমানও নই, আমার জাতি, আমার পরিচয় আমি মানুষ—

মহম্মদ । তোমার দেশ ?

শহেলী । দেশ ছিল ভারতবর্ষে, কিন্তু এখন—

মহম্মদ । এখন ?

শহেলী । যে পথ যখন হাতছানি দিবে ডাকে, সেই পথকেই বলি ঘর—চলতে চলতে পা দুটো ক্লান্ত হলে তখন যে পথের ধুলো আসন বিছিয়ে দেয়—সেই পথের মাটিকেই বলি দেশের মাটি !

মহম্মদ । তা যদি সত্য হয়, তা হলে ছনিয়া জোড়া তোমার ঘর, সারা ছনিয়াকেই বল তোমার দেশ ?

শহেলী । হয়তো তাই...

মহম্মদ । তবে কেন ফিরতে চাও হিন্দুস্থানে ?

শহেলী । স্বেচ্ছায় কি যেতে চাই ? মায়াবিনী আমায় যে পিছন হতে ডাকে । শুনেছি কোন সাগরজলে আছে মায়াবিনী কাল নাগিনীর দল । হাজার ফণা বাড়িয়ে দিয়ে তারা সর্বাঙ্গ অড়িয়ে ধরে, মেদ, মজ্জা, অস্থি সব চূর্ণ-বিচূর্ণ করে দেয় । হিন্দুস্থানের নীল দরিয়ার সেই কাল-নাগিনী আমায় তেমনি আকর্ষণ করছে—আমায় গ্রাস করতে চাইছে ।

মুক্তি চাই, তার গ্রাস হতে মুক্তি পাবার জন্য ছুটে পালাই—তবু সে ডাকে, হিন্দুস্থানী নাগিনী আমার ডাকে। আমি যেতে চাই না, কিন্তু তবু, তবু—ওই আমার ডাকে, ওই তার বিষের বাণী বেজে উঠেছে, আমার টানছে! আমি যাচ্ছি, কালনাগিনী, আমি যাচ্ছি...

মহম্মদ। শহেলীবার্জ...শহেলীবার্জ ..

শহেলী। না আমি যাব না—এমন করে মৃত্যু বরণ করতে পারব না! হে বিশ্ববিজয়ী সুলতান, তুমি আমার রক্ষা কর...নাগিনীর গ্রাস হতে তুমি আমার রক্ষা কর।

মহম্মদ। ভয় নাই, নিশ্চিত হও শহেলীবার্জ—তোমার জীবন রক্ষার ভার আমি গ্রহণ করলুম।

শহেলী। সত্য?

মহম্মদ। সন্মুখে এই সাধু মৈনুদ্দিন চিস্তিকে সাক্ষী করে বলছি, ঈশ্বরের নাম নিয়ে শপথ করছি, তোমায় আমি রক্ষা করব এবং শুধু তাই নয়, যে কালনাগিনী তোমায় গ্রাস করতে আসছে তাকে আমি... তাকে আমি...

শহেলী। তাকে তুমি...

মহম্মদ। চিরতরে বশ করে সেই নিবিষ ভূজঙ্গিনীকে আমি তোমারই পায়ের তলায় উপঢৌকন দেব।

শহেলী। সম্রাট! শাহানশা—!

মহম্মদ। আমার কি বিশ্বাস হচ্ছে না শহেলীবার্জ?

শহেলী। অবিশ্বাস নয়—এ আমার পক্ষে অতি বিশ্বাস।

মহম্মদ। সুলতানা! একে বেগম মহলে নিয়ে যাও। শহেলীবার্জ, যতদিন তোমার বিশ্বাসের শেষ না হয়, আশা করি ততদিন আমার মহালমধ্যে বাস করতে তোমার কোন আপত্তি হবে না—

শহেলী। হৃৎরতের অভিরুচি...

[ সুলতানা সহ প্রস্থান

মহম্মদ । নির্ঝাঁক হয়ে কি ভাবছ মৈনুদ্দিন ? কিছু বুঝলে ?

মৈনুদ্দিন । বুঝলাম—দরিয়া যেমন অতল স্পর্শ, নারী-চরিত্র ঠিক তেমনি—

মহম্মদ । হাঁ ঠিক তেমনি, ঠিক তেমনি ! আর ডুবরী যে, সেই ভেদ করতে পারে অতল দরিয়ার অসীম রহস্য...

মৈনুদ্দিন । হজরৎ, এ ক্ষেত্রে রহস্য ভেদ করে কি সন্ধান পেলেন ?

মহম্মদ । এই সন্ধান পেলুম যে ঐ হিন্দু নারী তার দেশের নিকট হতে, দেশবাসীর নিকট হতে হয়তো অতি চরম লাঞ্ছনা ভোগ করেছে । তাই প্রতি শূন্যে কাল নাগিনীর ভয়াল স্বপ্ন দেখছে । ওর ভেতর আমি প্রতিশোধের তীব্র বহি জ্বালিয়ে তুলব । হিন্দুস্থান অভিযানে ওই নারী হবে আমার প্রধান সহায়...প্রধান শক্তি—

মৈনুদ্দিন । শক্তি—

মহম্মদ । হাঁ, হিন্দুর শাস্ত্রে পত্নীকে বলে শক্তিরূপা, হিন্দুস্থান বিজয়ের পূর্বে ওই শহেলীবাঈ ওই অসামান্য নারীকে গ্রহণ করব আমি—

মৈনুদ্দিন । বেগম রূপে— ?

মহম্মদ । শুধু বেগম নয় বরু, প্রধানা বেগম রূপে !

## দ্বিতীয় দৃশ্য

কনোজ । প্রাসাদ অলিন্দ

তুঙ্গাচার্য্য, জয়চাঁদ ও মল্লাবতী

তুঙ্গাচার্য্য । জয়চন্দ্র, করিনু শ্রবণ—

সেনাগণ ব্যস্ত তব যুদ্ধ আয়োজনে ।

বহুদিন ছিলাম প্রবাসে, রাজ্যের সংবাদ কিছু

পাইনি সে হেতু । বল বৎস,

যুদ্ধ কার সনে ? বহিঃশত্রু ?

কিষ্ণা কোন প্রতিবাসী রাজ্য

আক্রমিতে আসিতেছে তোমার কনোজ ?

জয়চাঁদ । নহে বহিঃশত্রু দেব—নাহি মোর হেন প্রতিবাসী

স্পর্ধা যার আক্রমিবে কনোজ নগর ।

ঝাঠোর এ জয়চন্দ্র-ভয়ে বিকল্পিত সমগ্র ভারত ।

আর্য্যাবর্ত মাঝে একমাত্র প্রতিদ্বন্দী মোর

দিল্লীশ্বর পৃথ্বীরাজ—মদমত্ত গর্বিত চৌহান ।

তারি সনে যুদ্ধ হেতু করিতেছি সেনা সমাবেশ ।

তুঙ্গাচার্য্য । পৃথ্বীরাজ সনে যুদ্ধ ? কিবা অপরাধ তার ?

করেছে সে কোনরূপ ক্ষতি কি তোমার ?

প্রজার অনিষ্ট কিছু ? বল বৎস, পৃথ্বীরাজ পরে

কী হেতু তোমার এই মর্মান্তিক রোষ ?

অন্নচাঁদ । কি সাধ্য তাহার দেব, করে মোর ক্ষতি ?

প্রজার অনিষ্টে যদি হত অগ্রসর  
উপযুক্ত শাস্তি তার পাইত পামর ।  
নহে ক্ষতি, তারই তরে রাঠোর সম্রম  
লুপ্তপ্রায় ভারত হইতে ।  
উপযুক্ত শিক্ষা তারে না করি প্রদান  
গৌরব রবে না মোর, থাকিবে না মান ।

তুঙ্গা । বিবরিয়া বল বৎস, বশ মান লুপ্ত তব কিসের লাগিয়া ?

করে নাই পৃথ্বীরাজ কোনো ক্ষতি যদি,  
কেন তবে এ ক্রোধ তোমার !

অন্নচাঁদ । গুরুদেব,

প্রাণ হতে মান বড় ক্ষত্রিয়ের কাছে ।  
একই মাতামহ বংশোদ্ভব পৃথ্বীরাজ, আমি,  
আজমীরের সে চৌহান—কনোজ নগরে আমি  
ক্ষত্রিয় রাঠোর ।  
জানেন আপনি, পুত্রহীন বৃদ্ধ দিল্লীশ্বর !  
দিল্লী সিংহাসন মোর মাতুল বংশের  
সে কারণ পৃথ্বীরাজ লভে উপহার—সম অধিকার মোর  
ওই সিংহাসনে । তবু বৃদ্ধ রাজা চাহিলেন  
অধম ভিক্ষুক গণি মোরে, সিংহাসন পরিবর্তে  
তুষিবারে অর্থ বিতরণে !

তুঙ্গা । জানি অন্নচন্দ্র !

অন্নচাঁদ । শুধু তাই নয়, শুনুন আচার্য্য,  
পৃথ্বীরাজে বসাইয়া দিল্লী সিংহাসনে  
সভা স্থলে দিল্লীশ্বর করিলা ঘোষণা—

সিংহাসন দানিলাম সমর্থ, সবলে ।  
 এর চেয়ে কিবা দেব হবে অপমান ?  
 রাঠোর দুর্বল হ'ল, সবল চৌহান ?  
 জননীৰ উপরোধ করিয়া স্মরণ  
 এতদিন করি নাই কৃপাণ গ্রহণ ।  
 তা না হলে চৌহানের হৃদয় শোণিত  
 যমুনার নীল জল করিত লোহিত ।  
 দেখাইত সর্বজনে কে সবল, কে দুর্বল ।  
 কেবা বোগ্য অধিকারী দিল্লী সিংহাসনে—  
 পৃথ্বীরাজ কিম্বা জয়চাঁদ !

তুঙ্গাচার্য্য । এবে কি করিতে চাও  
 পৃথ্বীরাজ সনে তবে সমর ঘোষণা ?

জয়চাঁদ । সমর ঘোষণা নহে, করেছি মন্ত্রণা,  
 রাজসূয় মহাযজ্ঞ করি উদ্ঘাপন  
 লব সার্বভৌম পদ !

তুঙ্গাচার্য্য । রাজসূয় ? ভারত মাঝারে  
 কলিযুগে রাজসূয় হয়নি তো আর ।

জয়চাঁদ । সেই যজ্ঞ করিব এবার ।  
 পৃথ্বীরাজ যজ্ঞে যদি লয় নিমন্ত্রণ  
 কৌশলে উদ্দেশ্য মোর হইবে সাধন ।  
 রাঠোর প্রাধান্ত যদি করে সে স্বীকার  
 সত্য কহি, কিছুমাত্র তার প্রতি  
 রবে না বিধেব ।

তুঙ্গা । কিন্তু তুমি কি ভেবেছ বৎস,  
 হেন অসম্ভব কভু হইবে সম্ভব ?

অন্নচাঁদ । আনি আমি গুরুদেব, লোকমুখে শুনি,  
 আলিবে না ছরাচার মম নিমন্ত্রণে !  
 প্রতিবন্দী রূপে মোর বক্ত আয়োজনে দিবে বাধা ;  
 দিক বাধা, আমিও তাহাই চাই,  
 শক্তি তার ভাল রূপে পরীক্ষা করিব ।  
 করেছি মনন—

দ্বারপাল মূর্তি তার করিয়া নির্মাণ  
 বেত্র করে সভাস্থলে করিব স্থাপন ।

তুঙ্গা । দ্বারপাল মূর্তি ! দিল্লী ও আজমীর পতি  
 বীর পৃথ্বীরাজ—দ্বারপাল বেশে তারে  
 স্থাপিবে সভায় !

অন্নচাঁদ । দ্বারপাল রূপে গুরু ।  
 শক্তি থাকে আসিয়া সে লবে প্রতিশোধ,  
 আর যদি বিনা প্রতিবাদে সহে এই তীব্র অপমান,  
 কে দুর্বল কে সবল হইবে প্রমাণ !  
 শ্রীচরণে নিবেদন করিহু সকলি  
 দোষ গুণ আপনার বিচারে এখন ।

তুঙ্গা । অন্নচাঁদ, দোষ না দেখি তোমার ।  
 দোষ তাঁর, রাজপুত্র সৃষ্টিত যাহার ।  
 হেন অভিমानी জাতি নাহিক ধরায়—  
 ধরে তরবারি তাই কথায় কথায় ।  
 দিল্লীখর বলেছেন পৃথ্বীরাজে বীর,  
 তাহে পৃথ্বীরাজ প্রতি তব কি হেতু এ ক্রোধ ?  
 অত্রে তারে প্রশংসিলে কি দোষ তাহার ?  
 তার প্রতি কেন কর রোষ ?

অন্নচাঁদ । গুরুদেব—

তুঙ্গা । শোন বৎস, সমাগত ভারতের সঙ্কট সময়  
সিন্ধুনদ অতিক্রমি, গিয়াছিনু  
হিম্মলায়ে তীর্থ পর্য্যটনে ।  
অতি ছঃসংবাদ এক এমেছি শুনিয়া ।  
ভারতে তুর্কের রাজ্য করিতে স্থাপন  
আয়োজন করিতেছে মহম্মদ ঘোরী !

অন্নচাঁদ । মহম্মদ ঘোরী !

তুঙ্গা । ইয়া বৎস,  
মনে রেখো, মামুদের মত নহে লুণ্ঠন এবার,  
ইচ্ছা তার হিন্দুস্থানে চিরস্থায়ী সাম্রাজ্য স্থাপন ।  
সে উদ্দেশ্য হইলে সফল  
হিন্দুর অস্তিত্ব গর্ব ঘুচিবে নিশ্চয় ।  
না থাকিবে জাতি ধর্ম, গৌরব, সম্মান,  
লুপ্ত হবে বেদ, বিধি, দর্শন, বিজ্ঞান !  
দাসত্ব শৃঙ্খল গলে করি পরিধান,  
লুণ্ঠিত হইতে হবে তুর্কী পদতলে ।  
এ হেন সময় পৃথীরাঙ্গ সনে তব  
এ আত্ম-কলহ—পরিণাম ভাব অন্নচাঁদ !

অন্নচাঁদ । নিশ্চিত হউন গুরু ! দেবের প্রসাদে—

তুর্কী আক্রমণে আমি বিন্দুমাত্র নাহি করি ভয় ।  
সিন্ধুনদ অতিক্রম করিলে তাহারা  
দেশে পুনঃ ফিরে নাহি যাবে একজনো !  
সুলতান মামুদ ইতঃপূর্বে করে গেছে ষত অত্যাচার  
এইবার প্রতিশোধ লইব তাহার !

তুঙ্গা । শুন বৎস, বৃথা আক্ষালনে নাহি ফল !  
 রিপু-বীর্য্য না করি বিচার—  
 এহেন প্রতীতি নহে উচিত তোমার !  
 কুপবাসী মণ্ডুক নিচয়  
 ভাবে বিশ্ব কুপটুকু, আর কিছু নয় ।  
 ত্রেমতি হয়েছি আজ হতভাগ্য ভারত সন্তান ।  
 বিশ্বমাবো কত দেশ, কত জাতি আছে,  
 তাহাদের গুণ মোরা দেখিতে না পাই,  
 নিজেদের দোষ ঘাহা খুঁজিতে না চাই ।  
 অস্ততার অক্র, করি বৃথা অহঙ্কার  
 আপনার পদে হানি আপনি কুঠার !

অন্নচাঁদ । গুরুদেব !

তুঙ্গা । ত্যজ সর্ব অভিমান, মম অনুরোধ,  
 সন্মিলিত হও বীর পৃথ্বীরাজ সনে !  
 হতাশন সনে হোক বায়ুব মিলন—  
 দেখি তবে আৰ্য্য সূতে কে করে দমন !  
 নাঠোর চৌহান মিলি অস্ত্র করে দাঁড়ালে বারেক  
 রুদ্ধ হবে সেই দণ্ডে  
 ঃরকের পূর্বধুগী গতি !  
 মগধ, মিথিলা, বঙ্গ পাবে অব্যাহতি !  
 নীরব কি হেতু বৎস, বল একবার  
 পৃথ্বীরাজ সনে হবে মিলন তোমার !

অন্নচাঁদ । অসম্ভব গুরুদেব—

সে মিলন এ জীবনে হবে না কখনো ।  
 একই আকাশের তলে

একমনে চন্দ্র-সূর্য্য করে না বিরাজ,

সেই মত পৃথ্বীরাজ জয়চাঁদ

কোন কালে কোনদিন এক মাথে হবে না মিলিত ।

তুঙ্গা । তবে কি...তবে কি বৎস,

তুর্কীর দাসত্ব করা ভারতের অদৃষ্ট লিখন ।

জয়চাঁদ । আসে তুর্কী—নিজ বাহুবলে তারে

প্রতিরোধ করিব নিশ্চয় । পৃথ্বীরাজ সহায়তা

সে কারণ লব না কখনো—

তুঙ্গা । জয়চাঁদ—জয়চাঁদ...

জয়চাঁদ । বক্তব্য আমার দেব, সকলি বলেছি !

বিদায় চরণে এবে,

পৃথ্বীরাজ প্রতিশ্রুতি করিতে নির্মাণ

রাজশিল্পী অপেক্ষিছে ঘারে ।

[ প্রস্থান

তুঙ্গা । ভবিতব্য কে করে খণ্ডন !

ভারত অদৃষ্টাকাশে দেখিতেছি

ঘন ঘোর মেঘ সমারোহ ।

অবিলম্বে মহাবড় উঠিবে নিশ্চয় ।

( রানী মলয়াবতীর প্রবেশ )

মলয়া । গুরুদেব—

তুঙ্গা । এসো মা মলয়াবতী—

দারুণ সঙ্কট কাল সমাগত মাতা ।

এ সময় নীরব কি হেতু তুমি ?

মতী বিনা আর, পতিরে বুঝাতে বল

শক্তি আছে কার ?

মলয়া । গুরুদেব, বুদ্ধি হীনা নারী আমি,

রাজধর্ম রাষ্ট্রনীতি কি বুঝিতে পারি ?  
কেনে বুঝাব তাঁরে ? যা করেন মহারাজ,  
নির্বিবাহে নতশিরে তাই মেনে লই ।

তুঙ্গা । মাতা—

মলয়া । সে সকল কথা যাক্ ।  
একটা জিজ্ঞাসা মাত্র আছে স্ত্রীচরণে,  
যে জিজ্ঞাসা অন্তরে পশিয়া মোর  
দিবারাত্র করিতেছে ব্যাকুল চঞ্চল ।

তুঙ্গা । কি জিজ্ঞাসা মাতা ?

মলয়া । রাজসূয় বস্ত্র অন্তে হবে স্বয়ংবর,  
সংযুক্তা পাবে তো দেব, যোগ্য পতি তার ?  
সুখীতো হইবে বাছা ? এইমাত্র চাই,  
অন্ত বাহা নাহি দেব, অন্ত প্রশ্ন কিছু মোর নাই ।

তুঙ্গা । তুমি রাজেন্দ্রাণী, কি ঘটিবে ভবিষ্যতে,  
জানেন সে অন্তর্যামী যিনি ।  
করি আশীর্বাদ, সংযুক্তার হৃদক কল্যাণ—  
মনোমত পতিলাভ করুক বালিকা !  
কিন্তু মাতা, সুধাই তোমারে,  
স্বয়ংবর পূর্বে দৌছে  
জেনেছ কি সংযুক্তার মন ?  
বুঝেছ কি কারে ভালবাসে ?

মলয়া । হরতো বুঝেছি দেব,  
আভাসে ইঙ্গিতে, সখীগণ মনে তার  
ভীরু আলাপনে—যা কিছু বুঝেছি আমি,  
যা কিছু শুনেছি,

তাহে মোর আশঙ্কায় কম্পিত হৃদয় ।  
সত্য যদি মম অনুমান,  
যারে সে পূজিছে দেব, পতিজ্ঞানে  
অন্তর মাঝারে...বিধাতা জানেন শুধু  
তার মনে কি উপায় হইবে মিলন !

তুঙ্গা । সংযুক্তার মনোভাব  
বলেছ কি স্বামীরে তোমার !

মলয়া : সাহস নাহিঃ গুরু,  
একদিন কথাগুলো—দিয়েছিলু সামান্য আভাস !  
রোষ কষায়িত নেত্র ভংগিলেন মোরে । কহিলেন,  
“সাবধান, হেন বাণী পুনর্বার নাহি শুনি যেন ।  
সংযুক্তা বালিকা আজও,  
পূর্বরাগ ভালবাসা তার মনে জাগেনি এখনো !  
আলিবেন বহু নৃপ স্বয়ংবর স্থানে,  
যারে ইচ্ছা দিবে মালা ! কত্যা মোর জানে,  
পিতার তৃপ্তিতে তৃপ্তি হয় দেবতার ।”

তুঙ্গা । অয়চন্দ্র পিতা তার, তবু নাহি জানে,  
দিবেনা সে মাল্য কভু অপর কাহারে  
বিনা তার মনোমত ।  
পিতার আদেশে সংযুক্তা অর্পিতে পারে  
আপন জীবন, কিন্তু পতি নির্বাচনে  
বিধাতাও দিলে বাধা মানিবে না বালা !  
চল রাজেশ্রী, আশীর্বাদ করে আসি  
কত্যাংরে তোমার ।

## তৃতীয় দৃশ্য

দিল্লী। বিরামউদ্যান।

কবিচাঁদ বরদাই এবং যুবরাজ গোবিন্দ রায়।

গোবিন্দ। কি বলিলে চাঁদ কবি?

কনোজ নগরে তুমি স্বচক্ষে দেখেছ  
পৃথ্বীরাজ প্রতিমূর্ত্তি সাজিয়েছে গ্রহরীর বেশে?  
বেত্র করে দ্বারদেশে করেছে স্থাপন?

চাঁদ। শুধু তাই নয় যুবরাজ,  
আরও তীব্র অপমান স্বকর্ণে শুনেছি।

গোবিন্দ। কিসে অপমান—বল চাঁদ,  
সমস্ত শুনিতে চাই, কোর না গোপন।

চাঁদ। উল্লাসে রাঠোর ষত, প্রতিমূর্ত্তি করিয়া বেষ্টন,  
ব্যঙ্গ ও বিক্রম বাণী বর্ষে নিরন্তর।  
মূর্ত্তি লক্ষ্য করি কহে, “দ্বারপাল,  
হাস্তমুখে কার্য্য কর, দানিব বেতন।”

গোবিন্দ। চাঁদকবি—চাঁদকবি

চাঁদ। নিদারুণ শেল সম, অপমান বাণী  
বিধিয়াছে কর্ণে মম, বিদারিত করেছে অন্তর।  
ছদ্মবেশে আর তথা রহিতে নারিনু। রোষে ক্ষোভে  
করি প্রতিবাদ, পাছে ধরা পড়ি,—চলিয়া এসেছি তাই—  
দিল্লীখরে দানিতে সংবাদ।

গোবিন্দ। সব কথা মহারাজে বলিয়াছ তুমি?

চাঁদ। সব লি বলেছি যুবরাজ। কিছুমাত্র করিনি গোপন!

গোবিন্দ। কি উত্তর দিলেন নৃপতি?

চাঁদ । শুনিয়া আমার কথা  
 মৌন নেত্রে মহাবীর  
 শূন্যপানে চাহিলা বারেক,  
 বৈশাখের মেঘাচ্ছন্ন আকাশের মত  
 স্নগস্তীর নিস্তরতা হেরিহু বদনে ।  
 ক্ষণপরে কহিলেন মোরে,  
 যাও চাঁদ, এখন কর্তব্য যাহা  
 নাধিব সে কাজ, যুক্তি করি গোবিন্দের সনে ।

গোবিন্দ । যুক্তি ? কালহত স্পর্ধিত রাঠোর  
 পৃথ্বীরাজ প্রতিমূর্তি দ্বারদেশে বসায়েছে  
 প্রহরীর বেশে ! উপহাস করে তাঁরে  
 দ্বারপাল বলি—

এখনও গোবিন্দের যুক্তির অপেক্ষা ?  
 উত্তম, মহারাজে যুক্তি দিতে চলিলাম আমি ।  
 হাঁ, ভালকথা—শুন চাঁদ,  
 রাজকন্যা সংযুক্তা দেবীর সনে  
 হয়েছে কি সাক্ষাৎ তোমার ?

চাঁদ । হয়েছে সাক্ষাৎ সুবরাজ !  
 আধি অলে নিশিদিন ভাসিছেন তিনি  
 লক্ষ্মী যথা নারায়ণ বিরহ ব্যাকুলা ।  
 তুষিতে কন্যার মন গীত বাণ আয়োজন  
 করেছেন কনোজ দৈবর । চারণের বেশ ধরি  
 রাজপুরে করিয়া প্রবেশ. বার্ত্ত' আমি দানিয়াছি  
 লংযুক্তা মায়েরে । বলিয়াছি তাঁরে,  
 “রহ যাতা, কাল অপেক্ষার ।

আকুল আহ্বান তব  
নিজে আমি পৌঁছে দেব দিল্লীখর পাশে ।  
জেনো মনে, এ আহ্বান হবে না নিষ্ফল ।”

গোবিন্দ । তবু এক সঙ্গবাদ, নিশ্চিত্ত করিয়া তবু এসেছ দেবীরে ।

যাও চাঁদ কবি,—দূরদেশ পর্য্যটনে  
পরিশ্রান্ত তুমি...এবার বিশ্রাম লহ ।

চাঁদ । যথা আজ্ঞা—যুবরাজ—

[ চাঁদের প্রস্থান

গোবিন্দ । অপূর্ব এ বিধির বিধান,

ঘৃণিত রাঠোর কুণ পঙ্কের মাঝারে  
অন্বেছে এ পঙ্কজিনী দেবভোগ্যা দেবতা-বাহিতা ।  
জীবনে দেবতা জ্ঞান করি মোর জ্যেষ্ঠ সহোদরে,  
বিদলি রাঠোর পঙ্ক,  
আহরণ করি এই অম্লান পঙ্কজ,  
পূজার অঞ্জলি দিব জ্যেষ্ঠের চরণে ।

( পৃথীরাজের প্রবেশ

পৃথী । গোবিন্দ—

গোবিন্দ । দাদা !

পৃথী । এই যে গোবিন্দ !  
তুনেছ সংবাদ ভাই !

গোবিন্দ । অনিয়াছি দাদা,  
এইমাত্র চাঁদকবি বলে গেল য়ারে ।

পৃথী । চাঁদকবি ! ওঃ কনোজের কথা !  
না ভাই, শুনাতে এনেছি আমি  
আরও দুঃসংবাদ ।

গোবিন্দ । কি সে দুঃসংবাদ মহারাজ ?

পৃথী । মনে আছে, তীর্থ পর্যটন করি  
 গুরুদেব তুঙ্গাচার্য্য দেখেন সংবাদ  
 হিন্দুস্থান আক্রমিতে সেনা সমাবেশ  
 করিতেছে মহম্মদ ঘোরী ?

গোবিন্দ । মনে আছে দাদা—

পৃথী । এইমাত্র ভারত সীমান্ত হতে মম গুপ্তচর  
 পুনরায় এনেছে সংবাদ,  
 সুনন্দ্র তাহাদের যুদ্ধ আয়োজন,  
 সাগর তরঙ্গ সম বিপুল বাহিনী  
 হিমালয় গিরিবর্ত্তে অবিলম্বে হবে অগ্রসর ।  
 অপেক্ষিতে এবে তারা,  
 শুধু মাত্র সুলতানের একটি ইচ্ছিত ।

গোবিন্দ । সত্য যদি এ সংবাদ কি চিন্তা তাহাতে !

দেখিবে মুসলমান—হিন্দুর বিক্রম,  
 বুঝিবে অন্তরে হিন্দু নহে বীর্য্যহীন,  
 নহে সে অক্ষয় স্বদেশের গৌরব রক্ষিতে !

পৃথী । শুন ভাই, মুসলমান হতে হিন্দু বীর্য্যহীন নয়,

তবুও স্মরণ রেখো,

শুধুই বীরত্বে লভ্য নহে যুদ্ধ জয় ।

ভেষে দেখো, বীরত্বে, সাহসে কিম্বা শারিরিক বলে

না ছিলেন নূন পুরু ;

কিন্তু তাঁরে সময় কোণে পরাজিত বীর সেকেন্দর,

স্থাপিতা যবন রাজ্য অর্থাবর্ত্ত মাঝে ।

গোবিন্দ । সত্য, সত্য মহারাজ, অদীম বিক্রম ছিল—

তবু রণে পরাজিত হ'ল পুরুরাজ ।

পৃথ্বী । সে হেতু তোমারে বলি,—  
 শৃঙ্খলার, দৃঢ়তার, ধৈর্য্যে, আয়োজনে,  
 সুশিক্ষায়, একতার শ্রেষ্ঠতর যারা—  
 সেই জাতি যুদ্ধক্ষেত্রে জয়লাভ করে ।  
 এ শিক্ষা কোথায় ভাই,  
 আমাদের সেনাদল মাঝে ?  
 প্রাণ দিতে জানে তারা...  
 কিন্তু শিক্ষা কোথা, ...  
 কোথা জানে সমর কৌশল !  
 রাজার আদেশ শুনি  
 লাঙ্গল ছাড়িয়া তারা ধরে তরবার ।  
 যে অশ্ব গৃহের কার্য্যে পৃষ্ঠে ভার বয়  
 সেই অশ্ব রণক্ষেত্রে অগ্রসর হয় ।  
 জয়লাভে হয় তারা প্রদীপ্ত অনল,  
 পরাজয়ে হয় ক্ষণে তুম্বার শীতল ।  
 অনভ্যস্ত রণ ক্লেশে, শস্ত্র ব্যবহারে,  
 মাত্র “জয় মহারাজ” অভ্যস্ত চীৎকারে ।  
 এ হেন মৈনিক হেন রণসজ্জা লয়ে  
 কেমনে করিছ আশা বল যুদ্ধ জয়ে !

গোবিন্দ । হবে জয়, তবু হবে জয় দাদা, জানি সুনিশ্চিত ।  
 আগ্রত ভারত সিংহ তুমি পৃথ্বীরাজ,  
 আজাদীন দাম তব গোবিন্দের থাকিতে জীবন  
 সুনিশ্চিত জানি দাদা,  
 মুগ্ধিম পতাকা কভু এ ভারতে হবে না উড্ডীন !  
 তব মুখ পানে চাহি জ্ঞান হয় মোর

লভি যেন দেবের আশীষ !

দৈব—দৈব নিজে আমাদের রবে অমুকুল ।

পৃথী ।

সত্য বটে দৈব অমুকুল হলে

পৰ্ব্বত বিচূর্ণ করে ঈষিকার মূলে !

কিন্তু তাই, স্বজাতির স্মরি ব্যবহার

দৈব বলে আজও আশা আছে কি তোমার ?

পাপাচারে আমাদের পাছে চক্রধর

হন প্রতিকূল, নিরস্তর এই চিন্তা মম ।

কাব্যের কল্পনা, আৰ্য্য-বীৰ্য্য কথা লয়ে

মুগ্ধ হয়ে, ব্রাস্ত হয়ে, থাকিও না তাই !

ব্রহ্ম অস্ত্র, পাণ্ডপত নাহি পাবে আর—

রণস্থলে দেখা নাহি পাবে দেবতার !

নাহি সত্য, ত্রেতা, এবে সুসুপ্ত অমর,

দৈবে পূজি, কর আত্মপৌরুষে নির্ভর ।

গোবিন্দ । দাদা !

পৃথী ।

যাও তাই, সূক্ষ্ম সময় সিংহে প্রদান সংবাদ

ভারতের দ্বারদেশে আসিছে অরাতি ।

মিত্র রাজা সামন্ত নৃপতিগণে

জনে জনে করহ আহ্বান

এ সঙ্কটে এক বক্ষে হতে সম্মিলিত ।

গোবিন্দ । পাঠাব সংবাদ দাদা,

নিশ্চিত থাকুন । রোধিতে তুর্কির গতি

যোগ্য আরোজন তার রহিল আমার ।

সে কথা এখন থাক,

রাঠোরের আমন্ত্রণে রাজসূর বস্ত্রস্থলে

কি বেশে যাইব মোরা বলুন এবার !

পৃথ্বী । গোবিন্দ ! তোমার কি মত ভাহ ?

গোবিন্দ । কি মত আমার ?

আমি শুধু আচ্ছা তব চাহি নরনাথ,

আচ্ছামাত্র ছুটে যাবো কণোজ নগরে ।

যেথা সস্তানুলে তব প্রতিমূর্তি করেছে স্থাপন

সেথা পশি মূর্তি পদতলে পশুসম বলি দিব

নীচাঙ্গা রাঠোরে । যজ্ঞ করি লগ্নু ভগ্ন

রাঠোরে দানিয়া দগ্নু—

হে ইষ্ট, হে জ্যেষ্ঠ মোর,

তোমায়ে আনিয়া দিব ভাগ্যলক্ষী

সংযুক্তা দেবীরে ।

পৃথ্বী । উত্তেজিত হইও না ভাই—

গোবিন্দ । উত্তেজনা ! রাঠোরের যজ্ঞ স্থলে

দ্বার পাল বেশে ভারত গৌরব সূর্য্য রাজ্য পৃথ্বীরাজ !—

পৃথ্বী । কি ক্ষতি তাহাতে ভাই ?

আমারে প্রহরীবেশে রাখি যদি দ্বার দেশে

হর তাঁর গৌরব প্রচার—হোক,

কিবা ক্ষতি তার ? মানীর না মান যায়

প্রতিমূর্তি নাছিলে তাহার ।

বিশেষতঃ এ সময় দ্বার দেশে সমাগত হরন্তু অরাতি !

আস্র হানাহানি করি

বুধা বলকর করি, স্বদেশ, স্বধর্ম্ম, সব

স্বৈচ্ছার তুলিয়া দিব তুষ্টির কবলে ?

গোবিন্দ । হা হা—

পৃথ্বী । গোবিন্দ,—

অশ্রুখী, বিধাদিনী ভারত মাতার মূর্তি  
করহ স্মরণ; মাতার মর্যাদা রক্ষা  
কর ভাই একমাত্র পণ।

ক্ষুদ্র স্বার্থ, তুচ্ছ মান অপমান লয়ে,  
আত্ম কলহের ইচ্ছা এই দণ্ডে দাঁড় বিসর্জন।  
মনে মনে করিয়াছি স্থির—  
নির্কিঁবাদেরে রাজস্বয় করুক রাঠোর,  
কোনো বাধা দিব না আমরা।

গোবিন্দ। রাজস্বয় যজ্ঞ হবে? এ ইচ্ছা তোমার!

পৃথী। গোবিন্দ!

গোবিন্দ। উত্তম! কিন্তু শুনি—কি হইবে সংযুক্তা দেবীর—

পৃথী। সংযুক্তা!

গোবিন্দ। সত্য বটে মাল্য দান হয় নাই আজও,  
কিন্তু জানি সুনিশ্চিত তিনি তব মানস-মহিষী!  
তুমি ধ্যান, তুমি জ্ঞান সংযুক্তা সতীর।  
স্বয়ংবর সভাস্থলে সে সতীর মৌন আবাহনে,  
বল আর্ঘ্য, বল জ্যেষ্ঠ, কি দিবে উত্তর?

পৃথী। গোবিন্দ—গোবিন্দ—

তুমি ভাল জান ভাই—সংযুক্তাই পৃথীরাজ হৃদয় ঈশ্বরী।  
বাল্যের খেলার সাথী, কৈশোর সঙ্গিনী,  
যৌবনের মূর্তিমতী আনন্দ প্রতিমা!  
সখা, মন্ত্রী তুমি ভাই, তব অবিদিত নাই,  
কি প্রেম বন্ধনে যোরা বন্ধ দুইজনে।  
তবু তার তরে রাঠোর চৌহানে  
সমর সূচনা এবে হবে না উচিত।

জানি স্থির, অণু জনে বরিবে না সংযুক্তা কখনো,  
অনন্ত কুমারী ব্রত তার তরে বিধির বিধান ।

গোবিন্দ । বিধির বিধান নহে,

ক্ষম আর্ঘ্য, ক্ষম জ্যেষ্ঠ, স্পষ্ট বাক্য বলিব এবার,  
এ বিধি তোমার । কি বিচিত্র কথা !

রাঠোর, তুর্কির ভয়ে বিকম্পিত হয়ে—

পৃথ্বীরাজ করিবেনা বাগদত্তা বধুরে গ্রহণ ?

রুক্মিণী ডাকিলা যবে নারায়ণ বলি,

আসেনি কি নারায়ণ—

রুক্মিণী হরণ লাগি শক্রর নগরে ?

পৃথ্বী । গোবিন্দ—

গোবিন্দ । গোবিন্দের ইষ্ট তুমি, পূজ্য তুমি,

ধরিত্রী মাতার বক্ষে তুমি তার জাগ্রত দেবতা,

হে মহান,—ধ্যান নেত্রে দেখ তুমি

অশ্রুমুখী ভারত জননী ! আমি তব অনুচর,

সেবক অধম—আমি দেখি—শক্রপুরে কাঁদিতেছে

বন্দিনী সীতার মত আমার জননী ।

সিদ্ধি পার হতে যেন ভেসে আসে—

জানকীর আকুল আহ্বান,

রঘুনাথ,—সে আহ্বান হবে কি নিষ্ফল ?

পৃথ্বী । নিষ্ফল হবে না ভাই,

দ্বিধা হৃন্দ সব কেটে গেছে,

সত্যপথ দেখিয়েছ তুমি !

চল ভাই—যাব মোরা সংযুক্তা উদ্ধারে ।

ইয়া এক কথা—

স্বরণ রাখিও মনে—দ্বারপাল পৃথ্বীরাজে

বসিয়েছে তথা । বেতন লইতে তাই যাব ছদ্মবেশে ।

## চতুর্থ দৃশ্য

কনোজ । স্বয়ংস্বর সভায় দ্বারদেশ ।

একপার্শ্বে পৃথ্বীরাজের প্রতিমূর্তি ।

রাজগণ ও কনোজ মন্ত্রী ।

- মন্ত্রী । শুনুন রাজকুলবর্গ,  
প্রভু মোর কনোজ ঈশ্বর, সার্বভৌম নরপতি,  
মহারাজ জয়চন্দ্র আজ্ঞা মত কহি—  
শুভলগ্ন সমাগত হতে—  
এখনও স্বল্পকাল বাকী ।  
লগ্ন উপস্থিত হলে স্বয়ংস্বর সভামধ্যে পতি নির্বাচনে  
আসিবেন কল্যাণীয়া রাজ্যের নন্দিনী ।  
করুন সকলে এবে সুনির্দিষ্ট আসন গ্রহণ ।
- সকলে । সাধু...সাধু...( সকলে বসিল )
- ১ম রাজা । জম্মুবাড় নরসিংহ কি হেতু দাঁড়ায় ?
- নরসিংহ । না, ভাবিতেছি, দিল্লীশ্বর পৃথ্বীরাজ—ঐ—  
ওই হোথা আছেন দাঁড়ায় ! তিনি বর্তমানে,  
আসন গ্রহণ করা হবে কি উচিত ?  
আহা, দেখুন দেখুন সকলে,  
কী সুন্দর বেত্রশোভা দিল্লীশ্বর করে !
- সকলে । হাঃ হাঃ হাঃ.....
- ১ম রাজা । হঁ, তাগ্য ভাল, মর্শ্বের মূর্তি হস্তে  
বেত্র নাহি নড়ে । নহে সমুচিত উত্তর দানিতে—

নাশিয়া আ সিত বেত্র এতক্ষণ নিন্দুকের  
বদন উপরে ।

নরসিংহ । পৃথ্বীরাজে এত ভয় চান্দেল নৃপতি ?  
স্বয়ংবরে আসা তবে হয়নি উচিত ।  
তার চেয়ে গৃহে যাও, এত যদি ডর,  
মাথায় সিন্দুর পর, নাশায় বেলর ।

মকলে । হাঃ হাঃ হাঃ—

মন্ত্রী । রাজগণ, অমুরোধ,  
নিন্দা উপহাসে বাড়ে কলহ কেবল ।  
কাস্ত হয়ে বসুন আসনে ।

( নেপথ্যে শব্দধ্বনি )

মন্ত্রী । রাজগণ, হোন অবহিত,  
লগ্ন সমাগত । স্বয়ংবর সভামধ্যে  
আসিছেন রাজকন্যা পতি নির্বাচনে ।

( নেপথ্যে পুনঃ শব্দধ্বনি, অয়চন্দ্র, সংযুক্তা, সখী প্রিয়ব্রতা  
ও ভাটের প্রবেশ )

অয়চন্দ্র । এসো মা কল্যাণময়ী ।

এই দ্বার প্রান্ত হতে আরম্ভ হয়েছে—

সুবিপুল স্বয়ংবর সভা ।

হের দূর দূরান্তরে বসেছেন ভারতের নৃপতি মণ্ডল ।

হও অগ্রসর মাতা, পতি নির্বাচনে ।

যাও ভাট, একে একে নৃপগণ পরিচয় দাও সংযুক্তারে ।

( সংযুক্তা প্রণাম করিল )

করি আশীর্বাদ,

লভ প্রাণাধিকে, লভ যোগ্য পতি তব ।

সংযুক্তা । পিতা—

অয়চাঁদ । সঙ্কোচ কিসের মাগো,

হও অগ্রসর । কর ভাট, কর্তব্য তোমার—

ভাট । সন্মুখে তোমার হের সূচাকু হাসিনী,

অম্বরাজ পুত্র এই, পাণিপ্রার্থী তব ।

সৌন্দর্যে শোভার ভূস্বর্গ বলিয়া যার

খ্যাতি মর্তলোকে—সে কাশ্মীর

অবিভিন্ন অম্বরাজ্য হতে ।

হেরিবে মানবী হয়ে স্বরগের শোভা,

তটিনী রজতশ্রোতা, ক্ষেত্র চির শ্রাম,

নির্মল মুকুতা স্রাবী, তুঙ্গ মহীধর—

সজ্জিত বিচিত্র বর্ণে আলোক সম্পাতে

জুড়াইবে আঁধি তব ।

প্রিয়ব্রতা । রাজকণ্ঠা বলিছেন হতে অগ্রসর ।

ভাট । অতঃপর হের এই গুর্জর নৃপতি,

নিজে অলনিধি বিশাল পরিখা রূপে

রম্য রাজ্য যার রক্ষিছেন দিবানিশি ।

কহে সর্বজন—বাণিজ্যে লক্ষ্মীর বাস,

মূর্ত্তিমতি সেই লক্ষ্মী বিরাজেন গুর্জর মাঝারে ।

দেশ দেশান্তর হতে স্বার্থবাহগণ

আনে সেথা পণ্যদ্রব্য । যখন যা কুচি...

অশনে, বসনে, ঘানে, বিলাস ভবনে,

লভিবে তা গুর্জর মাঝারে ।

সংযুক্তা । চল সখী, অন্ত কোথা চল—

ভাট । শুন ব্রতণীমে, বিখ্যাত চান্দেল কুল

রাজপুত্র মাঝে। সে বংশ-ললাম এই রাজপুত্র  
 শুনি তব রূপ গুণ কথা—এসেছেন  
 পানীপ্রার্থী হয়ে !

সংযুক্তা। প্রিয়ব্রতা, অনর্থক বাড়িতেছে বেলা,  
 কহ ভাটে, হেথা আর একতিল নয়,  
 রাজগণ পরিচয়ে নাহি প্রয়োজন,  
 নিজে আমি অগ্রসর হইনু সন্মুখে।

[ প্রস্থান

ভাট। মহারাজ—

জয়চন্দ্র। ভাট ! সংযুক্তার ইচ্ছা হলে দিবে পরিচয়। [ ভাটের প্রস্থান  
 ১ম রাজা। জয়রাজ, বলিয়া কি হবে আর লাভ ?  
 উঠুন এবার !

নরসিংহ। দেখা যাক, স্পষ্ট কিছু বলেনি তো বালা,  
 ফিরে এসে পুনরায় মালা দিতে পারে।  
 কি দোষ বসিতে !

১ম রাজা। সত্য ! বিশেষতঃ সভার নিয়ম ভেঙ্গে  
 এবে উঠে গেলে, জয়চন্দ্র ক্রুদ্ধ হবে মনে।

( জয়চন্দ্র ও মন্ত্রীর পুনঃ প্রবেশ )

জয়চন্দ্র। বিদেশী তরনী ?

মন্ত্রী। বিদেশী তরনী মহারাজ ; অসংখ্য অগণ্য যেন,  
 জাহ্নবীর বক্ষ বাহি আসিতেছে এই দিক পানে।  
 পুরোভাগে তার রাজহংসাকৃতি তরী  
 কারুকার্যময় ! কোষের বসন  
 ষবনিকাকারে প্রলম্বিত দ্বারে,  
 ঝালরে মুকুতা পাঁতি।  
 কঙ্কতিকা, গোরোচনা, অলঙ্কর আদি  
 রহিয়াছে তরী গাত্রে অঙ্কিত ঘটনে।

অন্নচন্দ্র । জ্ঞান হয়, হবে কোনো নরপতি দূর দেশাগত ।

স্বয়ংবরে আসিবারে

সে কারণ বিলম্ব হয়েছে ।

নগর প্রহরী তোমা

কি বলিল আর ? সঙ্গে সৈন্য কত ?

মন্ত্রী । বিচিত্র পতাকাধারী শত অশ্বারোহী,

সহস্র পদাতী সহ, গজাতীরে পথের দুধারে

অগ্রসর শ্রেণীবদ্ধ ভাবে । ভীম কলেবর,

লৌহবর্ষাবৃত দেহ, দীর্ঘ শূল করে,

পৃষ্ঠে যুগ্ম তুণ, স্কন্ধে বিলম্বিত ধনু,

উক্ষীষ কাঞ্চনময় ঝলসয়ে আঁধি

তরুণ তপন করে, চমকে চপলা

প্রলম্বিত কোষ মুক্ত কুপাণ ফলকে ।

অন্নচাঁদ । কার সৈন্য, কার তরী,

কিছুই তো বুঝিতে না পারি !

স্বয়ংবরে এমন বিলম্বে—

মন্ত্রী । ঐ যে...ঐ যে দেখুন প্রভু,

প্রথম তরনী খানি উপস্থিত গজাতটে

লভা দ্বার দেশে !

( নৌকা হইতে ছদ্মবেশী গোবিন্দ নামিল )

গোবিন্দ । দূর দেশাগত জন,

আজ্ঞা চাই নরপতি,

দূতরূপে লভা প্রবেশিতে ।

অন্নচাঁদ । এসো দূত—

গোবিন্দ । প্রণিপাত দেব—দ্বারদেশে তব  
এসেছেন পাণ্ডু রাজ্যেশ্বর ! আমি তাঁর দূত ।  
কোথার আসন তাঁর, মহারাজ করুন নির্ণয় ।

অন্ন । পাণ্ডু রাজ্যেশ্বর !

গোবিন্দ । নিবেদিতে আপনারে कहিলেন শ্রুভু,  
আসিয়াছি যোদ্ধৃ বেষে, বেষ বিগ্রাসের  
পাই নাই অবকাশ দূর পর্য্যটনে,  
নাহি ইচ্ছা প্রবেশিতে সভার মাঝারে ।  
যদি হয় অনুমতি—রহিব এ দ্বারদেশে !

অন্ন । মন্ত্রী, পাণ্ডুরাজ্য কোথা ? কোনদিকে ?

মন্ত্রী । আছে মহারাজ, চের, চোল, পাণ্ডুরাজ্য  
সুদূর দক্ষিণে । কিন্তু হীন-ক্ষত্র তাবা,  
আদান প্রদান নাহি তাহাদের সাথে ।  
প্রভুর যা রুচি ।

অন্ন । হীন ক্ষত্র ? কিবা প্রয়োজন তবে  
আনি সভা মাঝে ? থাকুন বাহিরে  
তাঁর যথা অভিরুচি । कहিও,  
সাক্ষাৎ হবে স্বয়ংবর পরে ।

গোবিন্দ । যথা আজ্ঞা মহারাজ—

[ প্রস্থান

( সংযুক্তা, শ্রিয়বতা ও ভাটের পুনঃ প্রবেশ )

সংযুক্তা । বিধা, লজ্জা ত্যজি, ভাল করে সর্ব্বজনে নিরীক্ষণ  
করিয়াছি লগী,  
তিনি নাই, তিনি নাই এ সভা মাঝারে ।  
দেখেছ কি তুমি ?

শ্রিয়বতা । না লগি, আসেন নি তিনি...

সংযুক্তা। তবে ? কি উপায় হবে !

অন্নচন্দ্র। একি কণ্ঠা, ফিরে এলে হেথা !

সংযুক্তা। পিতা !

অন্ন। বল মাতা, কিসের সঙ্কোচ ?

পতি নির্বাচন তুমি করিয়াছ কারে ?

কার গলে দ্বিতে চাঁও বরমাল্য তব ?

হিমাচল হতে দূর কণ্ঠা-কুমারিকা—

যত দেশ আছে মাগো,—যত রাজ্য আছে,

সকল নৃপতি আজি সমবেত এই সভাস্থলে।

তা সবার মাঝে যারে তুমি পতি রূপে

করিবে বরণ—

করি অঙ্গীকার, জামাতা বলিয়া তারে

সমাদরে করিব গ্রহণ !

বল ত্বরা, কেবা সেই ভাগ্যবান্ এই সভাস্থলে ?

সংযুক্তা। পিতা, সভাস্থলে নাই তিনি।

অন্ন। সভাস্থলে নাই ! সমস্ত ভারতবর্ষ

হেথা সমবেত—ভারত গগন ব্যাপী

সমস্ত জ্যোতিষ্ক—

সংযুক্তা। জানি পিতা, ভারত-চক্রমা তুমি, বেষ্টিয়া তোমারে

হেরিলাম অগনণ নক্ষত্র বিরাজে, কিন্তু পিতা,

আকৈশোর কণ্ঠা তব সূর্য্য উপাসিকা।

তোমার এ সভাস্থলে ভারতের দীপ্ত সূর্য্য কই ?

অন্ন। ভারতের দীপ্তসূর্য্য ! কে সে সূর্য্য তোর ?

সংযুক্তা। পিতা !

অন্ন। অনুমানে বুঝি তোর হীন মনোভাব,

শিরায় শিরায় বহে অনল প্রবাহ !  
না না, উত্তেজিত হইব না আমি ।  
শোন কণ্ঠা, আদেশ আমার—  
সভামধ্যে বারে হর, এই দণ্ডে  
বরমাল্য করহ অর্পণ ।

সংযুক্তা । ক্রমা কর পিতা,  
পূজা আমি দানিব না অপর কাহারে,  
সূর্য্য-অর্য্য অধিকারী নহে কভু নক্ষত্র মণ্ডলী ।

অন্ন । বুঝিয়াছি এতক্ষণে, কণ্ঠাজ্ঞানে এতকাল  
হৃৎকদানে পালিয়াছি কাল ভুঞ্জঙ্গিরে ।  
শুনেছিমু বাঞ্ছা তোর মহিষীর মুখে,  
বিশ্বাস করিনি তবু ;  
আমার গর্জিত শির নত করিবারে,  
কালি দিতে অকলঙ্ক রাঠোরের কূলে  
সাপিনী নন্দিনী তুই লভিলি জনম ।

সংযুক্তা । পিতা—

অন্ন । ভারতের দীপ্ত সূর্য্য  
নাহি ওঠে নক্ষত্র সভায় !  
সত্য বলেছিম তুই,  
স্থান তার নাহি এ সভায়,  
আজ্ঞাবাহী দাস রূপে দেখে অভাগিনী,  
পৃথ্বীরাজ সূর্য্য তোর,  
ষেত্র করে দাঁড়ায়েছে সভার বাহিরে ।

সংযুক্তা । একি পিতা—কি করেছ তুমি !

অন্ন । উপাস্ত দেবতা তোর,

দেখ ভাল করে, হাশুমুখে দাসরূপে

রাঠোরের আশ্রয় পালিতেছে ।

রাঠোর নন্দিনী,

বিচারিয়া কর এবে কর্তব্য আপন !

সংযুক্তা । ইয়া, কর্তব্য করিব পিতা,

প্রদীপ্ত ভারত ভানু, বিক্রম কেশরী,

আর্য্যাবর্ত রাজ্যে মালার মাঝে,

সমুজ্জল মধ্য মণি যিনি,

সেই মহাজনে করি এই ঘৃণ্য অপমান,

যে পাপ করেছে আজ প্রমত্ত রাঠোর,

রাঠোর নন্দিনী আমি,

সেই পাপ করিব স্থালন ।

সম্মুখে জনক তুমি আরাধ্য দেবতা,

অস্তুরীক্ষে সাক্ষী হও সংযুক্তার অদৃষ্ট বিধাতা,

সাক্ষী রাজগণ, সাক্ষী হও আচার্য্য ব্রাহ্মণ,

পতিজ্ঞানে বরমাল্য দানিলাম এই পৃথ্বীরাজে ।

( প্রতিমূর্ত্তির কণ্ঠে মাল্য দান করিলেন । )

অন্ন । কি করিলি । কি করিলি ওরে লজ্জাহীনা !

শীঘ্র গতি বরমাল্য তুলে নিয়ে আয়—

সংযুক্তা । পতির পুঙ্খপুঙ্খ সতী বরমাল্য দিবে,

সে মালা তুলিয়া লবে সাধ্য নাহি কারো ।

অন্ন । পতি ! আমার জীবন শত্রু পতি হবে তোমার !

দেখ তবে দ্বিখণ্ডিত করি তোমার দাসরূপী পতির মস্তক ।

সংযুক্তা । কতু নয় । তার পূর্বে নিতে হবে সংযুক্তার প্রাণ—

অন্ন । বাধা দিলে তাই হবে ।

অবাধ্য কন্যার রক্তে সিক্ত তবে হোক মোর  
শাগিত রূপাণ—

( প্রতিমূর্ত্তিকে আঘাত করিতে অস্ত্র তুলিলেন । পৃথ্বীরাজ বাধা দিলেন ।

ছদ্মবেশী পৃথ্বীরাজ, গোবিন্দ ও সৈনিকগণের প্রবেশ )

পৃথ্বী । সাবধান মহারাজ,—

কন্যারে বধিয়া আর বীর-কীর্ত্তি কোর না প্রচার ।

অর । কে ! কে তুই হুঁহুতি—

পৃথ্বী । পাণ্ডুরাজ্যের আমি ।

কী দেখিছ রাজা, চতুর্দিকে ছদ্মবেশে বেষ্টিয়া তোমারে,  
আমারই আক্রমণবাহী সহস্র সেনানী !

চলে এসো রাজকন্যা !

অর । দাঁড়াও ! বুঝিয়াছি, ছদ্মবেশে তুমি পৃথ্বীরাজ !

সাহস না হল, সন্মুখে সমরে মোরে পরাজিত কর ।

ছলনার মিথ্যা পরিচয়ে কর কন্যারে হরণ ।

এই কি পৌরুষ ?

পৃথ্বী । পৌরুষ ! অতি ঘৃণ্য, বৃত্তিভোগী দ্বারপাল আমি,

পৌরুষের তবে মোর কিবা প্রয়োজন ?

তোমার পৌরুষ গাথা, যুগে যুগে বিশ্বময় হউক ঘোষিত !

উচ্চ কণ্ঠে বলুক সকলে,

মহাবীর অচর্চ্য রাজার কন্যারে—

দ্বারপাল লয়ে গেল তার প্রাপ্য বেতন হিসাবে ।

( নববৃত্তাকে লইয়া নৌকায় উঠিলেন )

অর । পৃথ্বীরাজ, দাঁড়াও, দাঁড়াও হোথা,

দাঁড়াও ত্বর—

পৃথ্বী । ছিঃ, ত্বর বোলো না রাজা,

কল্যাণীয়া আমার তা তোমার ।

শীঘ্রগতি চালাও তরনী,

নমস্কার পূজনীয় স্বপুত্র ঠাকুর !

# দ্বিতীয় অঙ্ক

## প্রথম দৃশ্য

দিল্লী । প্রাসাদ কক্ষ ।

পৃথ্বীরাজ ও সমর সিংহ ।

সমর । তাইতো, এ কিরূপ হল মহারাজ ?  
সেদিন হইল তব শুভ পরিণয়,  
নব বধু সনে বিশ্রুস্ত আলাপে  
মাস, বর্ষ, মধুরাত্রি করিবে যাপন  
সাধে বাহু সাধিল তোমার  
অরসিক তুর্কীরাজ মহম্মদ ঘোরী ?  
ভদ্রতা, ভব্যতা নাহি,  
হেন অসময়ে  
ব্যতিব্যস্ত করিতে তোমারে—  
আক্রমণ করিল ভারত ?

পৃথ্বী । রাজর্ষি সমরসিংহ,  
ঘারে তুর্কী সমাগত—এখনো রহস্য ?

সমর । ভগ্নীদানে যেইদিন সম্মানিত করেছো আমারে  
সেই হতে রহস্যের অধিকারী আমি,  
দিল্লীশ্বর পৃথ্বীরাজ শ্যালক আমার । আহা,  
উচ্চারিতে ভিহ্বা অগ্রে, পাই যেন  
মধুর আশ্বাদ ।

পৃথ্বী । তবে তুমি থাক তব রহস্য লইয়া,  
আমি যাই, কার্য্য আছে মোর ।

সমর । আহা, কে থা যাবে ?

ও, সংযুক্তা সুনন্দরী বুঝি

ইনারায় ডাকিছেন অন্তরাল হতে ?

পৃথ্বী । রাজর্ষি—

সমর । রাগ করিও না বন্ধু, দিব্য করিতেছি,

এবার রহস্য ক্ষান্ত । কেবল কাঙ্ক্ষের কথা—

বলিব এখন ।

পৃথ্বী । উত্তম, বল তবে মহারাজ,

বাধা দিতে তুর্কী দলে

কোন স্থান উপযুক্ত করিয়াছ স্থির ।

সমর । মানচিত্রে দেখ ভাই,

নিজ হস্তে চিহ্নিত করেছি ।

পৃথ্বী । তরায়ণ ?

সমর । তরায়ণ, সরস্বতী তীরে ।

থানেশ্বর সন্নিকটে, এই তরায়ণে

রোধিব তুর্কীর গতি । দিল্লী, আজমীর আর

মম রাজ্য চিতোর হইতে

তিন দলে সাজি সেনা এই স্থানে ভেটিবে শত্রুরে

( গোবিন্দের প্রবেশ )

গোবিন্দ । দাদা—

পৃথ্বী । এস ভাই, রাজর্ষি সমরসিংহ

তরায়ণে শত্রুদলে চান বাধা দিতে ।

তোমার কি মত ভাই ?

গোবিন্দ । সূচিস্থিত এই নির্বাচন,

কুরুক্ষেত্র সীমামধ্যে বিধর্মীরে

আসিতে দিব না। পূর্ব ভাগে  
রোধিব তাদের।

পৃথী। তবে তাই হোক—  
পুণ্য সরস্বতী তীরে দেখিব এবার—  
হিন্দুর অদৃষ্ট সূর্য্য উদয় শিখরে  
কিষ্কা যায় অস্তাচলে।

শুন ভাই, সামন্ত নৃপতিগণে, মিত্র রাজগণে,  
সংবাদ প্রেরণ কর—

নিজ নিজ সেনাবল লয়ে  
যথা কালে তরায়ণে হতে উপস্থিত।

গোবিন্দ। অবিলম্বে পাঠাব সংবাদ। কিন্তু—

পৃথী। কিন্তু—

গোবিন্দ। বহু রাজ্য আমাদের আশ্রয় করিবে গ্রহণ।  
অরাতি রোধিতে তারা হবে অগ্রসর।  
কিন্তু তবু প্রাণে মোর জাগিয়াছে অসীম হতাশা।

পৃথী। কেন ভাই—

গোবিন্দ। তোমার আদেশে ভারতের চতুর্দিকে  
গুপ্তচর করেছি প্রেরণ—নিজে ছদ্মবেশ ধরি  
দিকে দিকে করেছি ভ্রমণ!  
কি বুঝেছি, কি জেনেছি সাধারণ মানুষের মন,  
বলিতে সঙ্কোচ হয়, কুণ্ঠা আসে প্রাণে।

পৃথী। কি দেখিলে ভাই! বিধর্মী কবল হতে স্বদেশ রক্ষিতে  
চাহে নাহি ভারতে জনসাধারণ?

গোবিন্দ। স্বদেশ রক্ষিবে তারা!

শুন মহারাজ, গিয়াছিল

গঙ্গা, গগুকা সঙ্গমে,  
 কার্ত্তিকী পূর্ণিমা দিনে বসে তথা মেলা ।  
 নানাস্থান হতে কৃষি জীবীগণ  
 ক্রয় বিক্রয়ের তরে হয় তথা সম্মিলিত ।  
 সন্ন্যাসীর বেশে দাঁড়াইল বট বৃক্ষ মূলে ।  
 কোতুহলে বিরিঞ্চা আশায়  
 সহস্র সহস্র জন দাঁড়াইল আসি ।  
 কেহ দিল ফল মূল, কেহ তাম্রখণ্ড,  
 প্রণমিয়া কেহ দাঁড়াইল করজোড়ে ।

পৃথী । তারপর ?

গোবিন্দ । কহিগাম আমি—শুন দেশবাসী,  
 মহা লঙ্কটের কাল হল উপস্থিত ।  
 তুর্কী সেনাদল, শুনিয়াছ মোহনাথ  
 ভেদেছিল যারা—আসিছে আবার ?  
 এলবয় কেহ রহিও না উদাসীন ;  
 নিজ নিজ ভূগে করিও সাহায্য দান ।  
 রাজার বিপদে প্রজার বিপদ সদা  
 রাখিও স্মরণ ।

পৃথী । কি, কি বলিল তারা ?

গোবিন্দ । না বুঝিল কোন কথা, অথাক বিশ্বয়ে শুধু  
 রহিল চাহিয়া, শুনিলাম পরম্পর জিজ্ঞাসিছে সবে,  
 কে তুরক ? কেন আসে ?  
 বৃদ্ধ এক গ্রামের মণ্ডল—প্রণমি কহিল মোরে,  
 সন্ন্যাসী ঠাকুর, কি বলিছ,  
 কেন হেন দেখাইছ ভয় ? আসিবে তুরক সেনা

কি চিন্তা মোদের ? সেবার না ডরি মোরা,  
 অভ্যস্ত সেবার। রাজা, রাজমন্ত্রী, রাজগুরু, পুরোহিত,  
 সেনাধ্যক্ষ, কোষাধ্যক্ষ, অশ্ব হস্তি পাল,  
 সৈনিক, প্রহরী, কার পদ নাহি সেবি !  
 তবে আমাদের প্রভু, তবে চাহে সেবা,  
 কি লাজ তুরক রাজে সেবি যদি তবে ?  
 রাজার প্রহরী ধরে আসি, যাব যুদ্ধে,  
 যা জানি করিব। অরী হয় মহারাজ,  
 দিব পূজা বলি। অরী হয় তুর্কী-রাজ,  
 বসে সিংহাসনে, দিব কর।  
 বাস্তু মাতা থাকুন মস্তকে।

সমর।

পুষ্প পুরে বৌদ্ধ রাজা  
 কি বলিল শোনো। ব্রাহ্মণের বেশে  
 মম দূত সেথা গিয়ে কহিলা রাজারে,  
 মহারাজ, বীর পৃথ্বীরাজ—  
 স্বদেশ স্বধর্ম তরে প্রাণ আপনার  
 করেছেন যুদ্ধে পণ। হিন্দু বৌদ্ধ এসময়ে  
 হলে সম্মিলিত সাধ্য নাহি তুরকের  
 প্রবেশে ভারতে।

পৃথ্বী।

কি উত্তর দিল রাজা ?

সমর।

বলিল, ব্রাহ্মণ, তুমি চৌহাণের চর,  
 এসেছ কৌশল করি  
 সেনা অর্থবল মোর করিতে নিয়োগ  
 চৌহানের শত্রুজয়ে। বৃথা এ প্রয়াস,  
 নহি অর্কাচিন আমি। নাহিক বিবাদ মোর

তুরকের সাথে । চৌহানের পক্ষ লয়ে ।  
কেন তবে অকারণে ঘাঁটাইব তায় !

( চাঁদ বরবাইয়ের প্রবেশ )

চাঁদ । মহারাজ—

পৃথ্বী । এসো চাঁদকবি,

দাক্ষিণাত্য হতে তুমি কি সংবাদ আনিয়াছ বল ?

চাঁদ । অসীম ঔদাস্ত শুধু দাক্ষিণাত্য ঘিরি !

তুর্কীর বিক্রমবল, হিন্দু ধর্ম-দেব,

না ভাবে, না বুঝে তারা ।

হয়েছে বিস্মৃত লোমনাথ ধ্বংস !

গর্বে কহে কোন জন—

কার শক্তি বিক্রয় গিরি পারে লজ্ববারে,

মরিবে তুরক যদি প্রবেশে এ দেশে ।

কেহ কহে “অতিগর্বে আর্ঘ্যাবর্তবাসী

অবজ্ঞা উপেক্ষা করে দাক্ষিণাত্য জনে,

কিঙ্কিয়া নিবাসী বলে করে উপহাস ।

হয় যদি নিগৃহীত তুরকের করে—

কি ক্ষতি মোদের তাহে, ভাজুক গরব ।”

পৃথ্বী । নিগৃহীত দাক্ষিণাত্য...অভিমান ভরে

আপনার পদে হানে আপনি কুঠার ।

থাকুক তাদের কথা !

পুণ্ড্র্য সাধুগণ—

ত্রিবেণী সঙ্গমে যবে তুঙ্গাচার্য্য মনে

হল তাদের সাক্ষাত,

বলিলেন গুরুদেব—

“এসো সাধুগণ, আসিছে তুরক সেনা,  
 এ সঙ্কট কালে কাতরা ভারত মাতা  
 ডাকেন সবারে।” শিরে কুণ্ডলিত ছট’,  
 ভস্মাবৃত দেহ, জ্ঞানী সাধু অিজ্ঞাসিল—  
 কে ভারত মাতা? কারে উদ্ধারিতে বল!  
 কেহ বলে সংসার বিরাগী সাধু  
 নাহি ধন-জন কি লইবে তুর্কী তবে,  
 ধর্মমাত্র নিত্য—অনিত্যের তরে  
 পূজা পাঠ যাগ যজ্ঞ কি হেতু ত্যজিব।  
 পুনঃ কেহ উর্দ্বনেত্রে বলে মায়া বিজৃপ্তিত বিশ্ব  
 কেবা রাজা, প্রজা কেবা,  
 জ্ঞেতা কেবা জিত।

সবর। তুরকের আক্রমণে বিন্দুমাত্র  
 নাহি ছিল ভয়। ভয় এই দেশব্যাপী  
 ঔদাস্যে হিন্দুর।

পৃথ্বী। সত্য বলিরাছ রাজা  
 বুদ্ধিতে না পারি—  
 শিরোদেশে যার দাঁড়াইয়া হিমাচল  
 মহারুদ্ররূপী পদপ্রান্তে গর্জে হিন্দু তাণ্ডবলীলাঙ্গ  
 যে দেশে জনমে, নিংহ, শাদ্দুল গণ্ডার।  
 যে দেশে জনমে শাল, তাল, বজ্র বণু  
 সে দেশে জনম লতি কেন আর্য্যসুত  
 এমনি ঔদাস্যে বস্ত মূঢ়তা বিহীন!

গোবিন্দ। মহারাজ!

পৃথ্বী ।    যে হোক সে হোক  
           অস্ত ও শৃঙ্খল মোরে  
 পাঠিয়েছে মহম্মদ ঘোরী ।  
 পদাঘাত করি তার দাসত্ব শৃঙ্খলে  
 তরবারি করেছি গ্রহণ ।    হিন্দুর বাহুর বল  
 তরায়ণ যুদ্ধক্ষেত্রে দেখাব তুরুকে ।  
 যাও ভাই—  
 প্রত্যয়ে করিতে হবে সময় উদ্যোগ !  
 রাত্রি সুগভীর হল, রাজ্যি সময় নিংহে  
 লয়ে যাও বিশ্রাম ভবনে !

## দ্বিতীয় দৃশ্য

কনোজ প্রাসাদ । অরচন্দ্র, তুঙ্গাচার্য্য ও বলরাবতী ।

অরচন্দ্র । গুরুদেব ঙ্করণ শ্রবণ

বুঝিয়েছি তুঝকের লইলে আশ্রয়

দাদত্ব শৃঙ্খল শেষে পরিব নিশ্চয় ।

তুণাপি যতুপি পারি

গাবিত চৌচানে শান্তি দিতে

নাহি গোলা সের অপমানে ।

বে অনল দিবা নিশি অগ্নি দহিছে

ব্রহ্মাণ্ডে তা হতে কিছু নাহি ক্রেশকর ।

তুঙ্গাচার্য্য । বৎস কি হেতু এ অস্তব বেদনা

ভেবে দেখ,

সংস্ক্রানে আশীর্বাদ করেছিলে তুমি

যোগ্য পতি লভ বলি । সন্ডামধ্যে

পৃথীরাঙ্গ হতে যোগ্যতর কেবা ছিল আব ?

অরচন্দ্র । আনি দেব, যোগ্য পৃথীরাঙ্গ,

কিহু দে আশিরা কেন সন্ডামধ্যে বসিল না

তন্তরের প্রায় কি কারণ সংস্ক্রারে করিল হরণ ?

তুঙ্গাচার্য্য । সন্ডামধ্যে কেমনে বসিবে ?

এসেছেন দ্বারদেশে পাণ্ডু বাজ্যেশ্বর

এই কথা শুনি তুমিই আদেশ দিলে

অপেক্ষিতে সন্ডার বাহিরে ।

দাক্ষিণাত্যে পাণ্ডুরাঙ্গ করিয়া শ্রবণ

পাণ্ডুরাঙ্গা দিল্লী তব চল না স্বরণ ?

পৃথীর কি দোষ ! সংস্ক্রা স্বেচ্ছায় .

প্রতিমূর্তি বরিল তাহার ? ধর্ম পত্নী ত্যজি

সে কি বৎস গৃহে ফিরে বাবে ?

নিজে কারিগর ভ্রম,—

কল্পা জামাতার প্রতি অকারণ কেন কর রোষ ?

অরচাঁদ । পাণ্ড্য বাজ্যেশ্বর দ্বাক্ষিণাত্য বাসী

যত্রী বুঝাইল মোরে, তা হল ভ্রম !

করি প্রবন্ধনা, পাণিষ্ঠ কল্পারে মোর

করেছে হরণ, ছদ্মবেশে প্রতারণা

সভানন্দগণে—মিত্র সৈন্তস্বলে

সেনা রাখিল গোপনে ! সকলি জানে দেব,

তবু পৃথ্বীরাজ শুনে তব বিমুগ্ধ অন্তর ।

উত্তরেই শিখ্য আপনার ।

তার প্রতি কেন শুরু এত পক্ষপাত—

মালাবতী । হিঃ হিঃ ! একি কথা !

তুঙ্গাচার্য্য । এতদিন পরে

পক্ষপাতি আমি স্থির করিলে অন্তর ।

বা ইচ্ছা করিতে পার, আর কিছু বলিব না আমি

তোমার মঙ্গল হোক এই শুধু চাই ।

মালাবতী । শুরুদেব ত্যাগ করে আমাদের বাবেন না প্রকৃ !

পারেন ধরি করুন মার্জনা !

তুঙ্গাচার্য্য । ওঠ মাতা—

অরচাঁদ । কখন আমাদের শুরু । তিনকা মাসি পদে

কিন্তু দেব, দয়্য বার হতেছে হৃদয়

খাল তার হবে উক কি তাহে বিশ্বর ।

তুঙ্গাচার্য্য । অরচন্দ্র—

ଭରତେ । ପ୍ରଭୁ, ମର୍ୟାଦା ଆପନି  
 ମନୋହର ମନେ କହୁ ମାଧ କହୁ ଆଶା  
 ଆପନାବେ କେମନେ ବୁଝାବ ।  
 ଆଦର୍ଶିଣୀ କନ୍ୟା ଶାବ ଧାମାତାରେ ଲଗେ  
 ଭେଦେଚିତ୍ତ କହୁ କୁଥୁ ହୁଏ ହୁଏ ।  
 ଗୌରୀବ ଦୈତ୍ୟାବେ ଲଗେ ଦେଖାବୋ ମବାର,  
 ଯୁଗୟାୟ ଲଢ଼େ ଯାବ, ଲଗେ ଯାବ ଚରଣୀ ବିହାରେ ।  
 ଭଗ୍ନା ଧୋତ୍ୟ କହୁ କପ ବଜନ ଭୂଷଣ  
 ବେଶେଚିତ୍ତୁ ଆହବଣ କର୍ମ ।  
 ମବ ବୁଝା ହେ, ଆଶା ପୁଢ଼େ ଛାଡ଼ି ହରେ ଗେଲ ।  
 ଅପମାନ କର୍ମ ଯୋବେ ପାପପଠା ନନ୍ଦିନୀ  
 ବାଠୋବେର ଚିରକ୍ରମ ଚୈତ୍ୟାନେ ବରମ !  
 ବନ୍ଦିନୀ କାରୟା ଯଦି ଆନିବାରେ ପାରି  
 ବେଦାଧାତେ ପିତୃଭକ୍ତି ଲିଖାବ କନ୍ୟାରେ ।

ଯଶସୀ । ପ୍ରଭୁ ଯା ହବାବ ହରେ ଗେଲେ  
 ଫିରିବାର ପଥ ନାହିଁ ଆର  
 କରୁନ ଯାଉନା ତାବେ ।  
 କୁଣୀ ତୋ ହରେଲେ ତାରା ।

ଭରତେ । କୁଣୀ ।

ଯଶସୀ । ମକଳେ ଜାନାର ଯୋବେ  
 ପୃଥିବୀରାଜ ମଂସୁକ୍ତାବେ ଡାଳବାସେ  
 ପ୍ରାଣେର ଅଧିକ । ବ୍ୟକ୍ତ ସେ ମରମ ମଞ୍ଜାଲରେ ।  
 ରାଜ୍ୟର ମକଳ ଭାର ମଂସୁକ୍ତାରେ ଦେଲେ  
 ଦାନ ଧ୍ୟାନ, ପ୍ରଦାନ ପାଳନ  
 ମବ କରେ ମଂସୁକ୍ତା ଆରାମ ।

এত গুণ ছিল তার,  
 মাতা আমি কোনদিন বুঝিতে পারিনি ।  
 উজ্জল এ দুই বংশ সংযুক্তার গুণে  
 প্রভু, তার প্রতি রোধ তব কর পরিত্যাগ !

অরচন্দ্র । নিম্ন কার্যে যাও রাণী,  
 কহিও না কোন কথা আমাদের মাঝে !  
 থাকো পূজা পাঠ লয়ে  
 রাজকার্যে নাহি তব কোনো অধিকার ?  
 নারী হরে এত স্পর্ধা ?  
 মোরে চাও উপদেশ দিতে ?

তুঙ্গাচার্য্য । অরচন্দ্র ।

অরচন্দ্র । জন্মেছিলে অন্নহীন দরিদ্রের ঘরে  
 রাজগৃহে আনিলেন মাতা  
 শুনেছ সংযুক্তা বহু পেয়েছে ভূষণ  
 তাই একেবারে তব গলে গেছে মন ।  
 বংশের গৌরব মোর নাহি ভাব মনে  
 তুমি যে রাঠোর রাজি  
 একবারও সেই কথা পড়ে না স্মরণে ।  
 শুন রাণী কহি স্পষ্ট বাণী  
 বার বার হেন রূপে উত্যক্ত করিলে  
 কোনো পুরীতে স্থান হবে না তোমার ।

তুঙ্গাচার্য্য । ধিক্ ধিক্ তোমা অরচন্দ্রে  
 ক্রোধবশে দেখিতেছি লুপ্ত তব জ্ঞান  
 এমন দুর্ভাগ্য জাহ্নবী বল মহিষীরে  
 লক্ষ্মী স্বরূপিনী নারী পূজাহী দেবতা

মোহবশে সে নারীরে হেন অপমান !  
 এই পাপে, এই পাপে আৰ্য্যাবৰ্ত্ত ডুবিছে অতলে !  
 থাকুক এ সব কথা শুন অর—  
 সংযুক্তা ও পৃথীরাজ পাঠায়েছে মোরে !  
 চৌহানের মান যদি রক্ষা হয়  
 বা বলিবে, পৃথীরাজ সেই কার্য্য  
 করিবে নিশ্চয় । বল বৎস, কিসে তুট হও তুমি  
 কিসে তব দুরীভূত হয় এই রোষ !

অরচাঁদ । অস্তুরে জলিছে মোর বাড়ি অনল ।  
 নিভিবে না সে অনল  
 ঢালিলেও সপ্ত সিদ্ধু জল ।  
 দুরীভূত হবে রোষ ?  
 হা রোষ মম যুচিবে তখন  
 যখন শুনিব কর্ণে—সংযুক্তা বিধবা !

তুঙ্গাচার্য্য । নারায়ণ—নারায়ণ—  
 বলয়া । রক্ষা কর রক্ষা কর শুভঙ্করী মাতা ।

রাজমাতা । অরচন্দ্র—

অরচাঁদ । মাতা—

রাজমাতা । অন্তরাল হতে শুনি ।  
 না আসিয়া পারিহু হেথায়  
 ধিক্ শত ধিক্ তোরে ।  
 গুনিয়াছি সাপ, বাব নিজ শিশু খায়  
 তারও চেয়ে খল তুই ।  
 তোম অন্নপত্নী লয়ে স্বৰ্গগত মহারাজ

কহিলা আমারে—

জন্মিরাছে এই যে কুমার

ধরা তলে ত্রয়োধন এনেছে আবার

সাবু তিনি, তাঁর বাক্য হয় কি নিফল

বুঝিতেছি স্থির, তোমর হতে

রাজ্য, ধর্ম, সব হবে লয় ।

অন্নটান । মাতা—

না মমাতা । কি আশ্চর্য্য

সংযুক্তা বিধবা তুই উচ্চারণ

কবিলি কেমনে—না আর নয়,

অনেক পেষাচ্ছি আমি আর রতিব না কোর

এই পাপগৃহে ! মাতার অধিক

মোরে মানে পৃথ্বীরাজ—বব সংযুক্তার

কাছে এক লজ্জা আমার ।

মলয়া । ধেরো না মা আমি তো তোমার পদে

করি নাহি দোষ । কেন মা ত্যজিব মোরে ?

ছিনু মাতৃহীন, মাতৃস্নেহে তুমি মোরে

করেছ পালন, কি দোষে ত্যজিরা বাবে ?

যদি মহারাজ তব না রাখেন মান,

আমি মা গঙ্গার জলে দেহ বিসর্জিব ।

গিয়াছে সংযুক্তা তুমি মা চলিরা গেলে

দুঃখ বেদনার কণে

কার কাছে করিব ক্রন্দন ।

রাজমাতা । মা কল্যানী আমার !

মলয়া । আর নয় মুছে ফেল আমি জল মাগো—

বেখানে তোমার অশ্রু পড়িবে জননী

সেইখানে জলিবে অনল ।

এসো মাতা গৃহে ফিরে এসো—

[ উত্তরের প্রস্থান

তুঙ্গাচার্য্য । দেখো বৎস একবার

কী অনল জ্বালায়েছ আপনার গৃহে

দগ্ধ হইতেছ নিজে...সে অনলে পুড়িছে সকলে

এখনও আছে পথ

রাখ অনুরোধ,

সম্মিলিত হও বৎস, পৃথীরাজ সনে ।

তুর্কীর কবল হতে রক্ষ এ ভারতে ।

অন্নচাঁদ । উপায় নাহিক আর ।

করণ শ্রবণ, নৃসিংহ গোচরে

শোণিত অক্ষবে আমি তুর্কী রাজসনে

সন্ধি করেছি স্বাক্ষর—

তুঙ্গাচার্য্য । তুর্কী সনে সন্ধির স্বাক্ষর ?

অন্নচাঁদ । ই্যা প্রভু এইমাত্র পারি আমি করিতে স্বীকার

নিজ হস্তে রণক্ষেত্রে অস্ত্র ধরিব না ।

সৈন্ত দিব তুর্কীরাজে, আর দিব হস্তী যুধ মম !

তুঙ্গাচার্য্য । ধিক্ ধিক্ কি করিলে অন্নচন্দ্র তুমি—

অন্নচন্দ্র । জানি গুরু

ধর্ম্মদ্রোহী, দেশদ্রোহী আমি,

ইহকাল পরকাল ডুবিল আমার,

যতদিন হিন্দুজাতি রবে ধরাতলে

অন্নচাঁদ নাম হতে এ কলঙ্ক ঘুচিবে না কতু

তথাপি:তথাপি গুরু প্রতিজ্ঞা পালিব ।

চৌহান চূর্ণিয়া শেবে জীবন অর্পিব ।

## তৃতীয় দৃশ্য

নাট্যশালা

পৃথ্বীরাজ ও সংযুক্তা

পৃথ্বী । এসো দেবি, রাজ্যভার দানিয়া তোমারে,  
অস্ত্রাগারে, বস্ত্রাবাসে, নগরের চারিভিতে  
প্রাচীর নির্মাণে, হস্তীঅশ্ব সঞ্চালনে,  
সেনানী সজ্জায়, রাত্রি দিন রয়েছে ব্যাপৃত ।  
সংবাদ লইতে তব অবকাশ হয়নি আমার ।  
অপরাধ লইয়ো না দেবি—

সংযুক্তা । ছিঃ ছিঃ ওকি কথা প্রভু,  
স্বামী মোর ভারত-ভাস্কর,  
রক্ষিবারে জন্মভূমি শত্রু কর হতে  
নিদ্রাহীন নিশি জাগরণে  
করিছেন সমর উত্তোগ !  
তোমার সঙ্গিনী আমি—সে কারণ  
মনঃকোভ হইবে আমার ?

পৃথ্বী । সংযুক্তা—

সংযুক্তা । কৈশোর হইতে সাধ  
নিজহস্তে রণবেশে সাজাব তোমায় ।  
অসি, শূল, ধনুর্কাণ, বর্ম, চর্ম আদি,  
মায়ের আশীষ পুষ্পে মন্ত্রঃপূত করি  
সবতনে রেখেছি সাজায়ে ।  
স্বহস্তে পরায়ে তোমা কালিপ্রাতে পাঠাইব রণে,  
বিজয় গৌরব লয়ে এসো গৃহে ফিরে !

পৃথ্বী । ভাগ্যলক্ষ্মী তুমি মোর ।  
বিজয় লভেছি, যবে লভেছি তোমাতে ।  
কিন্তু দেবি, মনে রেখো—নহে একবার,  
হেন সাজে বহুবার সাজাতে হইবে ।

সংযুক্তা । কেন প্রিয়তম—

পৃথ্বী । কেন ! আৰ্য্যাবর্ত্ত বাসীদের অস্থি মজ্জা মাঝে  
কত গ্লানি, কত পাপ, যুগান্তের কত অপরাধ  
ধীরে ধীরে হয়েছে সঞ্চিত...বুঝিতে যতপি দেবি,  
সুধাতে না মোরে । আত্মকৃত অপরাধে  
হীন বল হয়েছি আমরা,  
পরাজয় মানি যদি ফেরে তুর্কি দল—  
আবার আসিবে ফিরে,  
আঘাতে আঘাতে যতদিন আৰ্য্য সভ্যতার  
এই জীর্ণ মহীরুহ নাহি হয় ভূমিসাৎ—  
ততবার করিবে আঘাত ।

সংযুক্তা । একি কথা বল প্রভু ?  
অনাগত আশঙ্কায় হিয়া কেঁপে ওঠে !  
কিসে পাপ, কিসে মহা অপরাধ  
করিয়াছে আৰ্য্যাবর্ত্ত . বাসী  
যার তরে হেন বাণী কহ !

পৃথ্বী । প্রিয়তমে, বর্ত্তমান ভারতের  
মানচিত্র দেখিতে কি চাহ ?  
চাহ কি দেখিতে ভারত জীবন রঙ্গ  
মম নাট্য গৃহে ?

সংযুক্তা । ভারত জীবন রঙ্গ !

পৃথ্বী । স্ননিপুণ চিত্রকর আঁকিয়াছে ছবি,  
সেই চিত্র পটে মুক-নৃত্যে নটনটী  
ভারত জীবন রঙ্গ করে অভিনয় !  
দেখিয়াছি আমি,  
তোমারে দেখাতে দেবি,  
শিল্পীগণ আছে প্রতীক্ষায় !  
কই শিল্পী, নৃত্য-নাট্য দেখাও দেবীরে !  
( আলোক জ্বলিল ; নৃত্য আরম্ভ হইল )

পৃথ্বী । কি দেখিছ দেবি—  
সংযুক্তা । দেখিতেছি, হিমাচল হতে অই  
রক্তত প্রবাহে নামিছেন ভাগীরথী !  
তটে দাঁড়াইয়া পুণ্য-কামী নরনারী !  
স্তব করে কেহ, কেহ বাজাইছে শঙ্খ, কেহ দেয় দীপ !  
কিন্তু একি,  
কে, ওরা ছুটিয়া এল সন্ন্যাসীর দল !  
তুই দলে তুমুল সংগ্রাম ! রুধিরের ধারা বহে  
জাহ্নবীর তটে ! একি হল প্রভু ?

পৃথ্বী । বুঝিলে না দেবি, শাক্ত ও বৈষ্ণব সাধু,  
কুন্ত যোগ দিনে ব্রহ্মকুণ্ড স্নানে  
কার অগ্রে অধিকার...শ্রেষ্ঠ কেবা হরি কিম্বা হর...  
এই লয়ে নিসংবাদ, এত রক্ত পাত ।  
তারপর দেখ দেবি, দাক্ষিণাত্য ছবি—

[ পুনঃ নৃত্য ]

পৃথ্বী । কি দেখিলে দেবি—  
সংযুক্তা । ভুক্ত অবশেষ পাত্র ফেলে ভৃত্যগণ,

তরুতলে বসি ভিখারিণী, ক্রোড়ে তার  
 শিশুপুত্র, ক্ষুধার্ত সন্তান লাগি  
 আবর্জনা স্থপ হতে কিছু খাও চায়।  
 পরিবর্তে লোষ্ট্র খণ্ডে হয়,  
 মাতা পুত্র উভয়ের বিক্লি ললাট !  
 অশ্রুসিক্তা ভিখারিণী শিশুরে দানিল  
 অন্ন কুকুর উচ্ছিষ্ট,  
 পিপাসার্ত শিশু যবে জল বিন্দু চাহিল কাতরে—  
 সম্মুখে নির্মল বাপী, তবু নারী পুত্র বুকে লয়ে,  
 কি হেতু ছুটিল প্রভু বালুকার পথে ?

পৃথ্বী ।

অম্পৃশ্য পারিয়া জাতি,  
 ব্রাহ্মণের গ্রামে বাপী স্পর্শে নাহি অধিকার,  
 তাই ছুটিয়াছে নারী নদী জল পানে !  
 পাপিনীর পাপদৃষ্টি দৈবে যদি  
 খাও দ্রব্যে পড়ে, অপবিত্র হইবে সকল।  
 তাই উত্তেজিত বিপ্র লোষ্ট্রাঘাত করিল তাহারে।  
 দেখিলে তো, কুকুর ভোজন করে  
 তাহে নাহি দোষ, দোষ হয় নরশিশু করিলে ভোজন।  
 বিশ্ব বন্ধু বিপ্র, দাক্ষিণাত্যে  
 হের তার অদ্ভুত আচার !  
 রঘুনাথ রামচন্দ্র—  
 চণ্ডালে বাঁধিলা যেথা প্রেম আলিঙ্গনে,  
 জাতি দর্প হের সেথা দেবি !

সংযুক্তা ।

প্রভু !

পৃথ্বী ।

দেখিয়াছ হরিদ্বার ভারত উত্তরে,

দেখিলে দ্রাবিড় ভূমি ভারত দক্ষিণে ।  
এবে হের পশ্চিমে গুর্জর ।

[ পুনঃ নৃত্য ]

পৃথ্বী ।

কি দেখিলে দেবি ?

সংযুক্তা

দেখিলাম বিশাল মন্দির । সন্ধ্যার আরতি হল  
আরক্ তথায় । ধূপ গুগ্গুলের গন্ধে  
আমোদিত পুরী, পূজক দর্শকে পূর্ণ  
মন্দির প্রাক্ষণ । সুবেশা সুকৃপা নারী  
নৃত্যে মাতোয়ারা । নৃত্য যবে শেষ হল,  
সমাপ্ত আরতি, নিবিল আলোক শিখা—  
তারপর প্রভু,  
দর্শক পূজক আর নর্তকীর দল—  
অন্ধকারে মিলাইল কোথা ?

পৃথ্বী ।

প্রিয়তমে, দেবদাসী এরা ।

চির ব্রহ্মচর্য্য লয়ে

দেবতার সেবা-ব্রত ইহাদের ।

কিন্তু পাপাসক্ত নর ডুবিতেছে নিজে,

আর ডুবাইছে এই অভাগিনী নারীগণে ।

শাস্ত্র আমাদের শিখায়েছে

সুকঠোর ইন্দ্রিয় সংযম ।

কিন্তু হায়, দেবের মন্দিরে দেখ—

কি হয়েছে পরিণাম তার !

সংযুক্তা ।

এত পাপ—এত পাপ এখনও

সহিছে দেবতা ! কাল বজ্র

এখনও পড়ে না মস্তকে !

পৃথ্বী । অধীর হোয়ো না দেবি !  
 উত্তর দক্ষিণ আর দেখিলে পশ্চিম ।  
 দেখ এবে পূর্ব প্রান্ত ভাগ ।  
 বঙ্গ বিহারের মাঝে ধর্ম নামে  
 তান্ত্রিকের যত স্বেরাচার—

( নৃত্য )

পৃথ্বী । কি দেখিলে দেবী !

সংযুক্তা । সুপ্রশস্ত সঙ্ঘারাম । অদূরে তাহার  
 দেখিলাম শক্তি পীঠ । বৌদ্ধ ভিক্ষুগণ  
 গুপ্ত সিদ্ধি তরে  
 চণ্ডাল কুমারী লয়ে বসিল বিরলে । অদূরে তাদের প্রভু,  
 চক্র বিরচিয়া ভৈরব ভৈরবী দল বসিল গোপনে,  
 কি যে পূজাবিধি কিছু না পারি বুঝিতে !  
 বীরাচারে কেহ নরমুণ্ড ধৃত করে  
 যজ্ঞের তিলক ভালে নাচিল উল্লাসে !  
 চাহি না দেখিতে আর এই—এই নৃত্য লীলা ।  
 ক্ষান্ত কর, ক্ষান্ত কর প্রভু !

পৃথ্বী । সংযুক্তা...সংযুক্তা...

সংযুক্তা । এ কি দৃশ্য দেখালে আমায় ?  
 ভারত জীবন রঙ্গ এই যদি হয়,  
 কিবা তবে পরিণাম ? এ জাতির উদ্ধার কোথায় !

পৃথ্বী । ব্যাকুলা হোয়ানা প্রিয়ে, হোয়ানা চঞ্চল ।  
 ব্যাধি আছে, আছে উপশম,  
 পতনের সঙ্গে আছে নব অভ্যুত্থান,  
 আছে নিদ্রা সঙ্গে তার আছে জাগরণ !

মৌন মুক মুখে মোরা দিব নব ভাষা,  
ধ্বনিয়া তুলিব প্রাণে নবোদিত আশা ।  
স্বেচ্ছাচার—আনাচার অজ্ঞতার ঘন অন্ধ নিশা  
স্বনিশ্চিত হবে অবসান ।

লক্ষ কোটি সন্তানের আত্ম-বলিদানে  
শোণিত রঞ্জিত মূর্তি তপন কিরণে  
ভারত অদৃষ্ট লক্ষ্মী ওই... ওই মত উদ্বিবে  
আবার !

[ ভারত মাতার মূর্তি দেখা গেল । উভয়ে প্রণাম করিলেন ]

### চতুর্থ দৃশ্য

দিল্লী । যমুনাতীর । দুৰ্যোগ রাত্রি ।

( মহম্মদ ঘোরী ও শহেলী বাদ্ঈএর প্রবেশ )

মহম্মদ । এ তোমার কি খেয়াল শহেলী বাদ্ঈ ? এ তুমি আমায়  
কোথায় নিয়ে এলে ?

শহেলী । কেন, দিল্লীতে যমুনার তীরে ।

মহম্মদ । তোমার ওপর আমার অনন্ত বিশ্বাস । নইলে আর কারুর  
কথায় এই সুদূর পথ অতিক্রম করে এই রাত্রি কালে কখনো শত্রুর  
ন গরে প্রবেশ করতুম না । যাত্রাকালে বলেছিলে, এখন কিছু বল  
না ; তাই প্রশ্ন মাত্র জিজ্ঞাসা না করে তোমার সঙ্গে চলে এসেছি !  
বল শহেলী বাদ্ঈ, এখনো কি আমায় বলবার সময় আসেনি ?

শহে কি ?

মহম্মদ । কেন নিয়ে এলে এখানে ?

শহেলী । তার আগে বলুন তো, আপনি পিশাচ, ডাকিনী বিশ্বাস করেন ?

মহম্মদ । পিশাচ, ডাকিনী ? ওঃ হাঃ হাঃ হাঃ, হ্যাঁ, শুনেছি, তারা তোমাদের রূপকথার মূলুকে থাকে... আর তাদের বিশ্বাসী ভক্তদের ঘাড় ভেঙ্গে রক্ত খায় ।

শহেলী । পরিহাস করবেন না, তারা রেগে গেলে অবিশ্বাসীকেও ছাড়ে না ; তারও ঘাড় ভাঙতে জানে !

মহম্মদ । বটে ! হাঃ হাঃ হাঃ ! তা এই সুদূর দিল্লীতে আমার নিয়ে এলে কি সেই ডাকিনীর, রূপকথা শোনাতে ?

শহেলী । শোনাতে নয় দেখাতে ।

মহম্মদ । দেখাতে !

শহেলী । হ্যাঁ, আজ এক ডাকিনীর সঙ্গে আমাদের দেখা হবে ?

মহম্মদ । সে কি !

শহেলী । হ্যাঁ, হিন্দুস্থান সীমান্তে প্রবেশ করেই তার সঙ্গে এক রাত্ৰিকালে দেখা হয়েছিল । দেখেই ভয়ে চমকে উঠলুম—সে হেসে বললে, ভয় নেই । আমার সমস্ত অতীত জীবন সে যেন নখ-দর্পনে দেখে বলে গেল ! একটা কথা তার মিথ্যা নয় ।

মহম্মদ । বিচিত্র কাহিনী—

শহেলী । বললুম “ভবিষ্যত বল”, সে বললে, আজ নয়...ভাদ্র মাসের অমাবস্যার রাতে দিল্লীর উত্তর দিকের মহাকাল শ্মশানে যাস, আমার দেখা পাবি । ভবিষ্যত বলব সে দিন ।

মহম্মদ । তোমার কথা শুনে তাকে দেখবার জন্ত কৌতূহল হচ্ছে শহেলী বাবু ! কিন্তু ভাবছি, আজ এই ভীষণ দুর্ঘোণের রাতে সে কি আসবে ?

শহেলী । এমনি দুর্ঘোণেই তার দেখা পাওয়া যায় । এই ভাদ্রের

অমাবস্যার চেয়েও সে ভয়ঙ্করী, ওই ভরা ষমুনার গর্জনের চেয়েও তার কণ্ঠস্বর আরও ভয়ঙ্কর। তার মূর্তি দেখলে, জোর করে বলতে পারি, এত বড় মহাবীর আপনি, আপনাকেও একবার ভয়ে কেঁপে উঠতে হবে।

মহম্মদ। বল কি! ভয়ে কেঁপে উঠব!

শহেলী। বেশ তো, দেখা হলেই বুঝতে পারবেন। শ্মশানে যে সব মৃতদেহ দাহ করতে নিয়ে আসে—ডাকিনী সেই শব দেহ থেকে ছিন্নকস্থা তুলে নিয়ে গায়ে জড়িয়ে থাকে, গলায় হাড়ের মালা, কাল সাপের মত জটার কুণ্ডলী পিঠে এলিয়ে পড়েছে, ঠুন ঠুন ঘুঞ্জুর বাজিয়ে সে চলে, সঙ্গে চলে তার বুনো শেরাল। সেই কাজল আর সিন্দুর মাখা মুখ, সেই তার অটুহাসি... ..যে একবার দেখেছে, যে একবার শুনেছে...জীবনে সে কখনো ভুলতে পারবে না।

মহম্মদ। শহেলী বাঈ—

শহেলী। সে এসে আজ আমাদের ভবিষ্যত বলবে। আর 'শুধু সেজন্তও নয়—আপনাকে তার কাছে নিয়ে এসেছি কেন জানেন?

মহম্মদ। কেন?

শহেলী। শুনেছি সে দিল্লীখর পৃথ্বীরাজের মৃত্যু কামনা করে।

মহম্মদ। পৃথ্বীরাজের মৃত্যু কামনা?

শহেলী। হ্যাঁ, ষমুনার তীরে শুকণা কাঠ দিয়ে চিতা সাজিয়ে পৃথ্বীরাজকে উদ্দেশে ডাকে “আয়-আয়-আয়, বিহানা সাজিয়ে দিয়েছি, ঘুমাবি আয়।” চিতা সাজিয়ে, তার মন ওঠে না—বলে, “না, এতে ছুঙ্গনের বায়গা হবে না, আরও বড় করে সাজাব, আরও বড় করে।” দিনের পর দিন পৃথ্বীরাজ আর তার রাণীর জন্ত ডাকিনী কেবল চিতাই সাজিয়ে রাখছে!

মহম্মদ। তোমার কথা যদি সত্য হয়, তাহলে এই ডাকিনীর কাছে

এনে তুমি আমার মহা উপকার সাধন করেছ শহেলী বাঈ।  
কিন্তু বলতে পার—কেন...কেন সে পৃথ্বীরাজের মৃত্যু কামনা  
করে? কেন তার এই আক্রোশ?

শহেলী। হজরৎ, আপনি আলহা উদালের কাহিনী শুনেছেন?

মহম্মদ। আলহা উদাল! হাঁ, শুনেছি তারা ছিল দুটি যমজ সহোদর।  
ভারতে তারা ছিল শ্রেষ্ঠ মল্ল-যোদ্ধা। শুধু ভারতে কেন, তাদের  
অমানুষিক দৈহিক শক্তির খ্যাতি ভারতবর্ষ ছাড়িয়ে হুদুর গজনী  
নগরীতেও ছড়িয়ে পড়েছিল। শুনেছি সেই দুই মল্ল যোদ্ধাকে  
পৃথ্বীরাজ অসি যুদ্ধে নিহত করেছে।

শহেলী। সত্য শুনেছেন। হিন্দুস্থানের প্রবাদ, সেই আলহাউদালকে  
এই ডাকিনী শিশুকালে স্তন দুগ্ধ দিয়ে পালন করেছিল। তাদের  
মৃত্যুর প্রতিশোধ নেবার জন্য ডাকিনী শ্মশানে প্রেত সাধনা  
করেছে, পিশাচ-সিদ্ধা হয়েছে। জীবনে তার একমাত্র কামনা—  
পৃথ্বীরাজের মৃত্যু।

নেপথ্যে মেঘা। “আয়... আয়...আয়”

মহম্মদ। ওকি!

শহেলী। ওই ওই তার কণ্ঠস্বর! ওই! দেখুন হজরৎ, শ্মশানে  
চিতার আগুন জ্বলে উঠেছে! সেই চিতা পার্শ্বে ঐ সে ডাকিনী...!

মহম্মদ। কি বিভৎস মূর্তি! ওকি! ডাকিনী ওকি কচ্ছে? অর্দ্ধদগ্ধ  
গলিত শবদেহ চিতা থেকে তুলে নিয়ে এসে ঝড়গা দিয়ে কাটছে।  
দুর্গন্ধ গলিত দেহের অস্থি মজ্জা দুহাত দিয়ে শবদেহ হতে তুলে নিচ্ছে!  
তারপর সেই অস্থিমজ্জা পালিত শৃগালকে খেতে দিচ্ছে! কি  
ভয়ঙ্কর! একি মানবী, না সত্যই পিশাচী?

শহেলী। ওই বুঝি নাচছে, গান গাইছে, নরমুণ্ড নিয়ে লুফালুফি  
খেলছে।

মহম্মদ । এদিকেই এগিয়ে আসছে না ?

শহেলী । হাঁ, আসুন, আগে অন্তরালে সরে আসুন ।

(উভয়ের প্রস্থান । অপর দিক দিয়া মেঘার গান গাহিতে গাহিতে প্রবেশ )

### ( গীত )

ধু ধু ধু ধু আখোরী মাঠ

নাহি তৃণ তরু নাহিক বাট

দপ্, দপ্, দপ্, আলেয়া

জ্বলিছে ঐ ।

সঙ্গী করেছি তাল বেতাল

খুঁজিয়া ফিরিছে নিজে মহাকাল

কোথারে দুভাই...

কোথায় আমার আল্‌হাউদাল কই ?

হা হা হা হা হাসি আড়রে পিশাচী

বৃশ্চিক মালিনী আর আর না'চি,

হয়েছে সময় রক্ত পিয়াব আর ।

এসেছে শমন ভারতের দ্বারে

পুরিবে গগন ভীম হাহাকারে

খর্পর দেরে তপ্ত রক্ত দুহাতে ভরিয়া লই ॥

আয়...আয়...আয়...( মহম্মদ ঘোরী ও শহেলী বাঁচি-এর প্রবেশ )

কে ! ওঃ তুই এসেছিস । দাঁড়া ..দাঁড়া.. তুই আবার কে রে ?

হঁ তুইও এসেছিস ; সাহস তো দেখি বেশ ; তা না হলে কেন স্পর্ধা

হবে মনে, গ্রাসিতে হিন্দুর দেশ । বল...বল...কি জানতে এসেছিস

বল—

মহম্মদ । শুনলুম তুমি মানুষের জীবনের অতীত, বর্তমান, ভবিষ্যত সব

দেখতে পাও । তা হলে বলতো, কবে আমাদের যুদ্ধে জয় হবে ?

মেঘা । যুদ্ধ জয় ? হবে...হবে, ভবিষ্যতে হবে । এখন কিছুতে নয় ।

মহম্মদ । এখন নয় কেন ?

মেঘা । নিজে বৃহস্পতি কেন্দ্রস্থিত তার, আছে বহু সুখ ভোগ । সিদ্ধি  
সর্বকার্য্যে, যাবৎ না ঘটে প্রতিকূল গ্রহযোগ !

মহম্মদ । তার প্রতি, গ্রহ কবে প্রতিকূল হবে ?

মেঘা । কনোজ নগরে গিয়ে একবার দেখে আয় সাবধানে, কোন্  
কোন্ গ্রহ কোথা করে স্থিতি গোধূলির অবসানে । কহিস আসিয়া,  
করিব গণনা, যুদ্ধ জয় কবে হবে ।

মহম্মদ । প্রহেলিকা বলে ভোলাতে চেয়ো না । সে যেমন আমার শত্রু,  
ঠিক তেমনি তোমারও শত্রু । তার মৃত্যুর সহজ, সরল পথ যদি  
কিছু থাকে আমায় বলে দাও । লোক মুখে শুনি—সে যুদ্ধে  
অপরাজেয় । এত শক্তি তার কিসে ?

মেঘা । কিসে শক্তি তার ? আছে তারা গড়ে, দেবী এক শিলাময়ী ;  
চৌহানস্থাপিতা, প্রসাদে তাঁহার সমরে সে বিশ্বজয়ী । ওই-ওই  
সে আসছে । আমি দেখেছি, সে আসছে । না, না, এখন কেন ?  
এখনও তো সময় হয়নি ! পালা—তোরা এখান থেকে পালিয়ে যা—  
এখন আমি দেখা দেব না । আমার শিবা কোথায় গেল ? শবা—  
আয় ..আয়...আয় .. (প্রস্থান)

মহম্মদ । পিশাচী সব কথা খুলে বলল না, হঠাৎ যেন...ওকি...

শহেলী । কি ?

মহম্মদ । ওই দেখ, বুঝি ডাকিনীর বিভৎস চীৎকারে ভয় পেয়ে আমরা  
যে ঘোড়ায় চেপে এসেছিলুম, সেই ঘোড়া ছুটে পালাচ্ছে । ঘোড়া  
না ধরতে পারলে এই রাত্রে শিবিরে ফেরা অসম্ভব হবে যে ! তুমি  
দাঁড়াও, আমি ঘোড়া ফিরিয়ে আনছি । (প্রস্থান)

শহেলী । ডাকিনী চলে যাবার সময় বলল, সে আসছে । তাকে দেখা  
দেবে না বলেই এখান হতে চলে গেল । কিন্তু কে-সে ? তবে কি

পৃথ্বীরাজ ? হাঁ, তাই হবে। খুব সম্ভব সেই আসছে এই শ্মশানের দিকে ! যাই, ডাকিনীর কথামত এখান থেকে চলেই যাই।

( পৃথ্বীরাজের প্রবেশ )

পৃথ্বী। দাঁড়াও ! কে তুমি রমণী ! এই ভীষণ অমাবস্তার রাত্রে একা একা এই নির্জন শ্মশানের ধারে এসেছ ! তোমার মনে কি কোনো ভয় নেই !

শহেলী। ভয় ? ভয় আমার ছায়াম্পর্শ করতে ভয় পায় মহারাজ—

পৃথ্বী। মহারাজ ! তুমি আমায় চেন ?

শহেলী। চিনিনা, তবে আপনাকে আমি জানি...

পৃথ্বী। কি ক'রে জানলে ?

শহেলী। জানলুম সেই পিশাচ-সিদ্ধা ডাকিনীর মুখে, আপনি এখানে আসবেন...সেই-ই-আমাকে বলেছে।

পৃথ্বী। পিশাচসিদ্ধা ডাকিনী ! তুমি...তুমি তাকে দেখছো ?

শহেলী। দেখেছি, কিন্তু তাতে বিশ্বয়ের কি আছে মহারাজ ?

পৃথ্বী। বিশ্বয় নয় ? আমার প্রহরীরা তাকে দেখলে ভয়ে মাথা নত করে প্রণাম জানিয়ে দূরে সরে যায়—অসম সাহসী কোন বীর সেনানী দৈবাৎ যদি তাকে রুখে দাঁড়ায় সে জলন্ত চিতাকার্তি নিয়ে পেছনে ধেয়ে আসে—সেনানী পালাবার পথ পায় না।

শহেলী। আপনার সেনানীরা তাকে দেখে ভয় পেতে পারে মহারাজ ! কিন্তু তা বলে আমার ভয় কি ! আমার এবং ঐ ভয়ঙ্করী ডাকিনীর স্বার্থ যে এক—

পৃথ্বী। এক স্বার্থ ? কি সে স্বার্থ—

শহেলী। সে শুনে আপনার কি হবে ?

পৃথ্বী। আমার প্রয়োজন আছে, তুমি বল।

শহেলী। তবে শুভুন মহারাজ, আমাদের উভয়ের এক স্বার্থ—সে স্বার্থ  
হল, আপনার মৃত্যু কামনা।

পৃথ্বী আমার মৃত্যু কামনা!

শহেলী। হাঁ আলহাউদালের ধাত্রীমাতা ঐ ডাকিনী। আলহাউদালের  
মৃত্যুর প্রতিশোধ নিতে, সে চায় আপনার মৃত্যু। আর আমি চাই  
আপনার মৃত্যু—সমস্ত ভারতের ওপর প্রতিশোধ নিতে!

পৃথ্বী। ভারতের ওপর প্রতিশোধ? তুমি—তুমি কে?

শহেলী। আমি শহেলী বান্ধি, না না, শুধু শহেলী বাই নই, আমি  
ভারত নারী—

পৃথ্বী। ভারত নারী!

শহেলী। হাঁ সেই ভারত নারী, চরম লাঞ্ছনা যার কপালে চন্দন টীকা—  
অপমান, উৎপীড়ন যার অঙ্গের ভূষণ—দেবতার পরমাত্র প্রসাদ জ্ঞানে  
যাকে করতে হয় পথ কুকুরের সাথে একই আবর্জনার স্তূপে বসে  
উচ্ছিষ্ট ভোজন।

পৃথ্বী। শহেলী বান্ধি—

শহেলী। দক্ষিণ ভারতের অতি নীচ বংশে আমার জন্ম। আমরা  
অস্পৃশ্য জাতি—কুকুর বেড়ালের চেয়েও অস্পৃশ্য, কিন্তু, তবু কুকুর  
বেড়াল নই, আপনাদেরই মত মানুষ জাতি। গাঁয়ে মহামারি লাগল,  
বাবা, মা, বিনা চিকিৎসায় মরে গেলেন। আমার কোলের কাছে  
শুয়ে ছিল ছোট ভাইটি—তাকেও কাল রোগে ধরল। তার কাৎরাণি  
সহিতে পাল্লুম না—তাকে বুকুে নিয়ে এক ফোঁটা ঔষধের জন্তু ছুটলুম  
বড় জাতের দোরে—হাঁ আপনাদেরই মত উঁচু জাতের কাছে। সবাই  
দরজা বন্ধ করে দিল, একটা ফুলের মত ছোট খোকা কুকড়ে মরে যায়  
কারু দয়া হোলনা, কেউ দিলে না এক ফোঁটা ঔষধ। “জল জল”  
বলে খোকন ভাই কেঁদে উঠল...তারা জলও দিল না—দিলনা তাদের

পুকুর ধারে যেতে। উর্দ্ধশ্বাসে ছুটলুম, দুক্রোশ মেঠো পথ ভেঙ্গে যখন আমাদের ছোট জাতের গাঁয়ে পৌঁছলুম, কাদা জল ঝাঁচল ভিজিয়ে যখন তার ঠোঁটের কাছে ধরলুম, চেষ্টা করে বললুম, “খোকা, জল খাও!” সে সাড়া দিলনা, বুঝলুম, সব পিপাসা তার শেষ হয়ে গেছে।  
পৃথ্বী। শহেলী বাঈ, শহেলী বাই—

শহেলী। আমিও মরতে চেয়েছিলুম, বিষ মুখের কাছে ধরে ছিলাম। এমন সময় তাকিয়ে দেখি, আমার চোখের সামনে ছায়ামূর্তি প্রেতাচার দল! সেই ছায়ামূর্তি, সেই প্রেতাচার দল কারা জানেন মহারাজ?

পৃথ্বী। কারা?

শহেলী। সে প্রেতাচার—বিনা চিকিৎসায় মরে গেছেন আমার সেই বাবার। সারা জীবন চরম লাঞ্ছনা নির্যাতন সয়েছেন আমার সেই মার। এক ফোঁটা জল না পেয়ে শুকিয়ে কুঁকড়ে মরে গেছে আমার সেই ছোট ভাইটির। তারা আমায় বললে, “মোর না, প্রতিশোধ নাও, আমাদের মৃত্যুর প্রতিশোধ নাও।” আমি বাঁচলুম—ভারতে আশ্রয় পেলুম না, ছুটে গেলুম সুদূর গজনীতে।

পৃথ্বী। গজনীতে! সেখানে আশ্রয় পেলে?

শহেলী। আশ্রয়? শুধু আশ্রয়? সমস্ত গজনীর অভিজাত বংশ আজ আমায় অভিবাদন করে ধন্য হয়—আমারই ভোজ সভায় আমারই সঙ্গে আহাৰ্য্য গ্রহণের আমন্ত্রণ পেলে তারা নিজেদের কৃতার্থ বোধ করে।

পৃথ্বী। বুঝেছি শহেলী বাঈ, তুমি মহম্মদ ঘোরীর আশ্রয় পেয়েছ। তারই সঙ্গে এসেছো ভারতের ওপর প্রতিশোধ নিতে।

শহেলী। দিল্লীখরের অনুমান সম্পূর্ণ সত্য। যে ধর্মোন্মাদ অভিজাত উদ্ধত ভারতবর্ষ পশ্চক স্বীকার করে কিন্তু তবু মানুষকে মানুষের

মত বাঁচবার অধিকার দেয় না—সেই ভারতবর্ষকে আমি শ্মশান করে দেব—আর সেই শ্মশানের ওপর পাতব আমার প্রতিহিংসার অগ্নি সিংহাসন।

পৃথ্বী। শহেলী বাদ্দি, তুমি এ প্রতিহিংসা ত্যাগ কর, মহম্মদ ঘোরীর আশ্রয় ত্যাগ কর—

শহেলী। সে আশ্রয় ত্যাগ করা চলেনা মহারাজ, আজ আমি মহম্মদ ঘোরীর কৃপাপার্থী আশ্রিতা নই—আমি তার বেগম—

পৃথ্বী। বেগম!

শহেলী। শুধু বেগমও নই! কুকুর বেড়ালের মত আপনারা যাকে তাড়িয়ে দিয়েছিলেন—সে আজ মহম্মদ ঘোরীর প্রধানা বেগম—

পৃথ্বী। শহেলী বাদ্দি শোনো,—শহেলী বাদ্দি—

শহেলী। ক্ষমা করবেন ভারতেশ্বর, আজ আর কৃপা করে লাভ হবে না।  
গোড়া কেটে ডালে জল দিলে সে ডাল কখনো ফল ফুল দেয় না।

( প্রস্থান )

### পঞ্চম দৃশ্য

মহম্মদ ঘোরীর শিবির। জাহান্দার ও বিবি।

জাহান্দার। আইয়ে, আইয়ে, মেরা বিবিজান,—

বিবি। তোমার তো স্পর্ধা খুব! লড়াই বেঁধে গেছে; এখন তুমি শিবিরে বসে সরাব পান কচ্ছ'?

জাহান্দার। লড়াইএ কি হয়—কিছু ঠিক নেই। শুনেছি পৃথ্বীরাজ খুনে লোক, অতবড় জবর দোস্ত, সেপাই আলহাউদালকে মেরে

ফেলেছিলো। এবার বাঁচি কি মরি খোদাতায়ল্লা জানেন, যতক্ষণ  
বাঁচি তাই ক্ষুণ্ণি করে নিচ্ছি। নাচো বিবিজান, নাচো।

( নাচের পর বিবির প্রস্থান )

চলে গেলে যে ! ও বিবি, বিবিজান, তোমায় না পেয়ে আমি যে  
লবেজান—

( হামজবীর প্রবেশ )

হাম। জাহান্নার, এই উল্লু—

জাহ। ও বাবা, হুজুর—

( প্রস্থান )

হাম। কি আশ্চর্য্য ! বাইরে এমন লড়াই হচ্ছে এখনো এই অপদার্থের  
আমোদ করবার সখ যায় !—

( শহেলী বাঈয়ের প্রবেশ )

শহেলী। একি হামজবী সাহেব ! ভীষণ যুদ্ধ আরম্ভ হয়েছে। আপনি  
এখনও এই শিবিরে ?

হামজবী। বেগম সাহেবা, আমাদের অজ্ঞাগার এই পার্শ্বের শিবিরে।  
যুদ্ধক্ষেত্রে অস্ত্র, অশ্ব, হস্তী প্রভৃতি যখন যা প্রয়োজন হয় তাই সর-  
বরাহ করবার জন্য হুজুরং আমাকে এখানে রেখে গিয়েছেন। আর  
তা ছাড়া—

শহেলী। তাছাড়া—

হামজবী। খোদাতালা না করুন, যদি কোন অতর্কিত বিপদ উপস্থিত হয়  
তখন বেগম সাহেবাকে নিরাপদ স্থানে পৌঁছে দেবার ভার....এই  
বান্দারই ওপর।

শহেলী। অতর্কিত বিপদ ! হামজবী সাহেব, আপনার কি বিশ্বাস  
যে এ যুদ্ধে আমাদের পরাজয়—

হামজবী। অসম্ভব বেগম সাহেবা ! স্বয়ং শাহাবুদ্দিন মহম্মদ ঘোরী  
যেখানে সৈন্য পরিচালনা করেন সেখানে জয়লাভ সুনিশ্চিত। তিনি

সাধারণ মানুষ নন...তিনি হায়দার, মানে সিংহ...অমানুষিক দৈহিক শক্তির জন্তু তাকে দুনিয়ার লোকে বলে দ্বিতীয় রুস্তম। নিশ্চিত মনে অপেক্ষা করুন বেগম সাহেবা, অবিলম্বে যুদ্ধ জয়ের আনন্দ সংবাদ আমি নিজে এসে আপনাকে পৌঁছে দেব !

শহেলী। তাই বলুন হামজবী, সেই শুভ সংবাদ শোনবার জন্তু আমি সাগ্রহে প্রতি পল গণনা করব। ( হামজবীর প্রস্থান )

মহম্মদ ঘোরী হায়দার, দ্বিতীয় রুস্তম ! তার সঙ্গে যুদ্ধে কে পারবে ? এ যুদ্ধ জয় অনিবার্য ! কিন্তু তার ফলে...তার ফলে সোনার ভারত অশ্রুপান হয়ে যাবে—গৃহে গৃহে উঠবে মর্মান্তিক ক্রন্দনের ধ্বনি, আমার দেশ, আমার জন্মভূমি...না, না, কে জন্মভূমি...ভারতবর্ষ আমার শৃগাল কুকুরের মত বিতাড়িত করেছে ! জলুক, জলুক, আগুন ! উঠুক আর্ন্তনাদ ! ওরে, তোরা আনন্দ কর, উৎসব কর, বিজয় উৎসব কর...

( নর্তকীগণের প্রবেশ ও নৃত্যগীত )

অসি বাজে ঝগ ঝগ

আজি এ বিজয় লগনে,

আনন্দ গান ধরনী ছাপিরা

উঠুক হৃদয় গগনে।

টলমল ধরাতল বীর দল

চরণ চাপে,

নীলবিষ নিষ পিষ হিস্ হিস্

বাহুকী কাঁপে।

বাজে তুরী ভেরী ঘনঘন

দামামা বাজে,

অরিদলে শঙ্কিত কম্পিত করি সঘনে।

( গীতান্তে নর্তকীদের প্রস্থান, নেপথ্যে কোলাহল )

শহেলী । ও কি ! ও কিসের কোলাহল ! তবে কি যুদ্ধ জয় করে...  
না, না, ওতো আনন্দ ধ্বনি নয়, ও যে আর্তনাদ ! শিবিরের এত  
কাছে, কাদের আর্তনাদ ! কোন পক্ষের !

( হামজবীর পুনঃ প্রবেশ )

হামজবী । বেগম সাহেবা, দুঃসংবাদ বহন করে এনেছি । অকস্মাৎ  
যুদ্ধের গতি পরিবর্তিত হয়েছে । হিন্দু পক্ষ বিপুল বিক্রমে আমাদের  
আক্রমণ করেছে । তাই হজরতের ইচ্ছা এই মুহুর্তে এই তরায়ণ  
যুদ্ধক্ষেত্র হতে আপনাকে তব্র হিন্দু দুর্গে অপসারিত করতে ।

শহেলী । তব্র হিন্দু দুর্গে ! এ সংবাদ কে নিয়ে এসেছে ?

( কুতবের প্রবেশ )

কুতব । আমি নিয়ে এসেছি বেগম সাহেবা—

শহেলী । সৈন্যধ্যক্ষ কুতব উদ্দিন আইবেক ! তুমি এ সময়ে যুদ্ধক্ষেত্র  
ত্যাগ করে—

কুতব । এখনি আবার যুদ্ধক্ষেত্রে যাত্রা করব বেগম সাহেবা ! অন্য  
কোনো সাধারণ দূতের মুখে হজরতের আদেশ শুনলে আপনি যদি  
প্রত্যয় না করেন...যদি এ স্থান ত্যাগ করতে না চান, তাই হজরত  
আমাকেই এই আদেশ দিয়ে পাঠিয়েছেন । শিবির দ্বারে দেহরক্ষী  
সেনাদল উপযুক্ত যানসহ প্রস্তুত । আপনি এই মুহুর্তে তব্র হিন্দু  
যাত্রা করুন ।

শহেলী । হজরত স্বয়ং এই আদেশ দিয়েছেন ? তবে কি যুদ্ধে আমাদের  
পরাজয় হয়েছে !

কুতব । না বেগম সাহেবা, পরাজয় হয়নি...

শহেলী । নিশ্চয়ই পরাজয় হয়েছে, নইলে তিনি কখনো এ আদেশ  
দিতেন না । কোথায়...কোথায় হজরত, আমি তাঁর কাছে যাব—  
তাঁর মুখ হতেই.....

কুতব । তিনি যুদ্ধক্ষেত্রে, আপনি কেমন করে এ সময় তাঁর কাছে....

শাহেলী । আঃ বাধা দিও না—কুতব ! আমার আজ তোমরা কেউ  
বাধা দিতে পারবে না । ( প্রস্থান )

হামজবী । কুতব উদ্দিন !

কুতব । সব প্রচেষ্টা ব্যর্থ হলো ! ভেবেছিলুম কৌশলে বেগমকে নিরাপদ  
স্থানে পাঠাব কিন্তু সব আয়োজন বৃষ্টি পণ্ড হয়ে যায় ।

হামজবী । তবে কি যুদ্ধে আমাদের সত্যই পরাজয়—

কুতব । একে শুধু পরাজয় বলে না বন্ধু, একে বলে ধ্বংস—

হামজবী । ধ্বংস !

কুতব । ঘন কৃষ্ণ মেঘের মত বিরাট হস্তী পৃষ্ঠে দিল্লীশ্বর পৃথ্বীরাজ, দক্ষিণে  
চিতোরের রাণা সমরসিংহ, বামভাগে যুবরাজ গোবিন্দ রায় । কি  
অদ্ভুত তাদের সমর কৌশল, কি অব্যর্থ তাদের অসি চালনা ! সমস্ত  
সৈন্য আমাদের বিপর্যস্ত হয়ে গেছে ! তারপর স্বয়ং সাহাবুদ্দিন  
মহম্মদ ঘোরী যখন আহত হলেন—

হামজবী । হজরৎ আহত...

কুতব । ভীষণ আঘাত । যুবরাজ গোবিন্দ রায়ের কালান্তক মহাশূল তাঁর  
বাহুমূল ভেদ করেছে । অবিশ্রাম রক্ত পাতে হজরত অচৈতন্য  
হয়ে অশ্ব পৃষ্ঠ হতে ভূমিতলে পতিত হচ্ছিলেন ; কোন প্রকারে তাঁকে  
ধরে সৈন্য সাগর মথিত করে এই শিবিরে নিয়ে এসেছি !

হামজবী । তবে কি...তবে কি হজরৎ এখনও অচৈতন্য ?

কুতব । জানি না...হেকিম সাহেব শুশ্রূষা করছেন । আমাদের সেনাদল  
ছত্রভঙ্গ ! হিন্দু সৈন্য তাদের পশ্চাৎ ধাবন করেছে । অবিলম্বে তারা  
এই বজ্রবাসে ছুটে আসবে । হজরতের এই নিদারুণ আঘাতের  
সংবাদ শুনলে বেগম কাতর হয়ে পড়বেন ; তাই ভেবেছিলুম—

কৌশলে ঠুকে পূর্বভাগে তব্ৰ হিন্দ দুর্গে যাত্রা করিয়ে আমরা আসব  
পশ্চাতে আহত হজরতকে নিয়ে । কিন্তু—কিন্তু—

নেপথ্যে । হর হর মহাদেও ।

হামজবী । ঐ হিন্দু সৈন্তের জয়ধ্বনি ! কুতবউদ্দিন, তারা আমাদের  
শিবির আক্রমণ করেছে ।

কুতব । আর বিলম্ব নয় হামজবী ! এসো, অস্ত্র করে আমরা ঐ শত্রু  
সাগরে ঝাঁপিয়ে পড়ি । যতক্ষণ পারি জীবন দিয়ে আমাদের হজরতকে  
রক্ষা করি । ( উভয়ের প্রস্থান )

নেপথ্যে হরহর ধ্বনি

( আহত মহম্মদ ঘোরী ও শহেলীর প্রবেশ )

মহম্মদ । না, না, আমায় ছেড়ে দাও, ছেড়ে দাও শহেলী বাঈ, আমি  
ওদের সঙ্গে যুদ্ধ করব !

শহেলী । আপনি যে ভীষণ আহত ?

মহম্মদ । হোক ! তবু যাব, পিঞ্জরাবদ্ধ জানোয়ারের মত ওরা আমাকে  
খুঁচিয়ে মারবে—সে আমি হতে দেব না...মরি তো অস্ত্র হাতে নিয়ে  
মরবো । দাও...আমায় অস্ত্র দাও...অস্ত্র দাও—

শহেলী । নিয়ে আসছি হজরৎ, আমি অস্ত্র নিয়ে আসছি । ( প্রস্থান )

নেপথ্যে—হর হর মহাদেও ।

( গোবিন্দ রায় ও সৈনিকগণের প্রবেশ )

গোবিন্দ । এই যে মহম্মদ ঘোরী, এতক্ষণে পেয়েছি শয়তান...

মহম্মদ । কে ! গোবিন্দ রায় ! আমায় বধ করবে ? দাঁড়াও, আমার  
বেগমকে পাঠিয়েছি, সে এলে...

গোবিন্দ । সে এলে কি হবে সাহাবুদ্দিন মহম্মদ ঘোরী ! রণস্থল হতে  
প্রাণ লয়ে পালিয়ে এসেছ কি বেগমকে সামনে রেখে যুদ্ধ করবে বল ?

মহম্মদ । বেতমিজ, কমবখত । যদি সাহস থাকে, দে...আমায় অস্ত্র দে—  
অস্ত্র দে—

গোবিন্দ । নিশ্চয়ই দেব মহম্মদ । হিন্দুজাতি এত অমাহুষ নয় যে নিরস্ত্র  
শত্রুকে অস্ত্রাঘাত করে । নাও এই অস্ত্র । এই অস্ত্র নিয়ে আত্মরক্ষা  
কর ।

( যুদ্ধ । মহম্মদ পড়িয়া গেল )

এবার ! এবার ঘোরীরাজ, আল্লার নাম স্মরণ কর । তোমার  
জীবনের এই শেষ ! ( অস্ত্র তুলিল )

( পৃথীরাজের প্রবেশ )

পৃথী । না না—ওকে বধ করো না ! ওকে শৃঙ্খলিত করে প্রেরণ  
করো...দিল্লীর—লৌহ কারাগারে...

( শহেলী বাদ্দের প্রবেশ )

শহেলী বাদ্দ । দিল্লীখ্বর...দিল্লীখ্বর...

পৃথী । অ্যা ! ওঃ—শৃঙ্খল মোচন কর । যাও ঘোরী, তুমি মুক্ত ।

গোবিন্দ । আপনি...আপনি...মহম্মদ ঘোরীকে মুক্তি দিলেন !

পৃথী । হাঁ, দিলুম মুক্তি । যতদিন সবল বাহুতে অস্ত্র ধারণ করতে পারব—  
যতক্ষণ পার্শ্বে থাকবে গোবিন্দের মত ভাই, রাজর্ষি সমর সিংহের মত  
বন্ধু—ততদিন এক মহম্মদ ঘোরী ত তুচ্ছ...সহস্র মহম্মদ ঘোরীকেও  
আমি ভয় করি না ভাই ; ভয় করি—এক নির্যাতিতা ভারত নারীর  
তপ্ত অশ্রু ধারা !

শহেলী । দিল্লীখ্বর...

পৃথী । যাও শহেলী বেগম, মহম্মদ ঘোরীকে নিয়ে আবার গজনীতে ফিরে  
যাও । শুধু যাবার বেলায় শুনে যাও, মরুভূমির মাঝখানে হাত  
বাড়িয়ে পিপাসার বারি বিন্দু পাওনি বলে...সমস্ত ভারতবর্ষকেই স্নেহ-  
হীন, মায়াহীন, মরু রাক্ষসী বলে ভ্রম করোনা ; এই মরু কাস্তারময়ী  
ভারতের বুকেই এখনো বয়ে যায় বিগলিত মাতৃ করুণা রূপিনী  
গঙ্গা ষমুনা ।

## তৃতীয় অঙ্ক

### প্রথম দৃশ্য

মহম্মদ ঘোরীর শিবির । মহম্মদ ঘোরী ও কুতব ।

কুতব । হজরৎ !

মহম্মদ । কে ? কুতব ! দিল্লীখর পৃথ্বীরাজ আমাকে এক পত্র পাঠিয়েছেন, সেই পত্রের কি উত্তর দেওয়া উচিত সে বিষয় পরামর্শ করবার জন্যই তোমাকে ডেকে পাঠিয়েছি কুতব ।

কুতব । কি পত্র লিখেছেন দিল্লীখর ?

মহম্মদ । আমাকে সঙ্ঘোধন করে লিখেছেন, “তরায়ণের যুদ্ধে তুমি শোচনীয় ভাবে পরাজিত হয়েছ । তারপর এক বর্ষের অতীত হয়নি, আবার তুমি কোন সাহসে আমার সঙ্গে শক্তির পরীক্ষা করতে এসেছ ? মহম্মদ ঘোরী, জীবনে কি তোমার বিতৃষ্ণা হয়েছে ? তাই কি ইচ্ছা করে এবার জীবন বলি দিতে এসেছ ? তা যদি হয়...তা হলে যুদ্ধের পূর্বে তোমার সৈন্য সেনাপতিদের কথা স্মরণে রেখো । তাদের হয়তো এখনো বাঁচবার সাধ আছে । সুতরাং তাদের মুখ চেয়ে যুদ্ধ ক্ষেত্র ত্যাগ করে স্বদেশে ফিরে যাও ।”

কুতব । বটে, এত স্পর্ধা ওই পৃথ্বীরাজের যে হজরতকে এই অপমানকর পত্র প্রেরণ করতে সাহসী হয় !

মহম্মদ । তার স্পর্ধার হেতুও তো এই পত্র মধ্যেই উল্লেখ করা রয়েছে ।

কুতব । কি সে হেতু ?

মহম্মদ । প্রথম যুদ্ধে আমাদের শোচনীয় পরাজয় । অথচ সে পরাজয়ের জন্য...আজ এই যে অপমানকর পত্র পৃথ্বীরাজ আমাকে পাঠাতে

সুযোগ পেল এর জন্তু ••দায়ী আমি নই, দায়ী তোমরা, দায়ী তোমাদের নির্বুদ্ধিতা ।

কুতুব । হজরত—

মহম্মদ । এই তরায়ণ রণক্ষেত্রে শত্রুর মুখোমুখি দাঁড়িয়ে আজও সেই প্রথম যুদ্ধের স্মৃতি আমি ভুলতে পারছি না । গোবিন্দ রায়ের অস্ত্রাঘাতে বাহমূল হতে প্রচুর রক্ত পাত হল, আমি মূচ্ছিত হয়ে পড়লুম । অমনি তোমরা আমার অচেতন দেহ শিবিরে ফিরিয়ে নিয়ে এলে । যুদ্ধ ক্ষেত্রে হতে আমাকে শিবিরে ফিরিয়ে আনা, সেই হল তোমাদের মারাত্মক ভুল ! আমি পলায়ন করছি মনে করে সৈন্যদলের মনোবল ভেঙ্গে গেল, উর্দ্ধ্বাসে তারা পৃষ্ঠ প্রদর্শন করল ; তার ফলে শত্রুর অস্ত্রাঘাতে তারা দলে দলে নিরীহ মেঘের মত নিহত হল । কেন, কেন তোমরা সেদিন আমার শিবিরে ফিরিয়ে আনলে ?

কুতুব । হজরৎ, একান্ত নিরুপায় হয়েই আপনাকে শিবিরে নিয়ে এসেছিলুম । প্রমত্ত গজ পৃষ্ঠে ধেয়ে আসছে শূল হস্তে দিল্লীখর পৃথ্বীরাজ ; আপনার তখন অস্ত্রধারণ করবারও ক্ষমতা ছিল না, আর এক মুহূর্ত্ত বিলম্ব করলে হয়তো—

মহম্মদ । আমার মৃত্যু হত ? তাতে কি ক্ষতি হত ? মহম্মদ ঘোরী যেত, কুতুব উদ্দিন আইবেক ছিল, কুতুব উদ্দিন নিহত হলে, কোয়াম উলমুলুক হামজবি ছিল ।

কুতুব । হজরৎ—

মহম্মদ । মহম্মদ ঘোরীর মৃত্যু হত ? হাঁ হ'য়তো হতো ! কিন্তু আমাকে বাঁচাতে গিয়ে সে দিন তোমরা ভারতবর্ষে ইসলাম সাম্রাজ্যের মৃত্যু ঘটিয়েছ, ইসলাম মর্যাদাকে বিপন্ন করে তুলেছ । এ লজ্জা...এ গ্লানি যতদিন দিল্লীর সিংহাসন অধিকার করতে না পারি ততদিন পর্য্যন্ত আমাকে আচ্ছন্ন করে রাখবে !

কুতব। আপনি নিশ্চিত হন হজরৎ। এবার প্রয়োজন হয়, বুকের রক্ত দিয়ে এ গ্লানি, এ লজ্জা বিদূরিত করব। খোদার নামে শপথ, জীবন দেব, তবু ইসলামকে বিপন্ন হতে দেব না।

মহম্মদ। উত্তম! তোমাদেরি বাহু-বল, তোমাদেরি বিশ্বস্ততায় নির্ভর করে আমি বর্ষকাল অতিবাহিত না হতে আবার এই তরায়ণ যুদ্ধ ক্ষেত্রে উপস্থিত হয়েছি। হিন্দুর যুদ্ধ নীতি কিরূপ তা প্রথম যুদ্ধেই ভাল করে বুঝে নিয়েছি। এবার যেরূপে ওদের দুর্বলতা...সেই দিকেই আঘাত করতে হবে। হাঁ, এবারকার অশ্ব-বল ?

কুতব। সার্কিলক্ষ সুশিক্ষিত অশ্ব।

মহম্মদ। সার্কিলক্ষ! কনোজ এবং জম্মুর সংবাদ ?

কুতব। তাঁরা গত যুদ্ধে যে হস্তী পাঠিয়েছিলেন এবার উপযাচক হয়ে পাঠিয়েছেন তার চতুর্গুণ !

মহম্মদ। চতুর্গুণ হস্তী ? উপযাচক হয়ে ?

কুতব। হাঁ হজরত! তাঁরা স্পষ্ট বলে পাঠিয়েছেন—তরায়নের প্রথম যুদ্ধে দুর্দর্ষ মহাবীর সাহাবুদ্দিন মহম্মদ ঘোরীকে পরাজিত করে পৃথ্বীরাজ সমস্ত ভারতবর্ষে আতঙ্কের সৃষ্টি করেছে। উপযুক্ত শিক্ষা না পেলে পৃথ্বীরাজ হয়তো অবিলম্বে সমস্ত ভারতবর্ষের একচ্ছত্র সম্রাট হয়ে বসবে। সে অপমান আমরা সহ্যে পারব না। প্রয়োজন হয়, তুর্কীর অধীনতা স্বীকার করব—তবু পৃথ্বীরাজের আধিপত্য সহ্য করব না—

মহম্মদ। ঠিকই বলেছেন তাঁরা। বিদেশীর পদানত হওয়া যায়, কিন্তু তা বলে স্বদেশীয় মহাবীরের গৌরব গাথা সহ্য করা যায় না। জয়চাঁদ, জম্মুরাজ প্রভৃতি রাজ্যবর্গের এই মনোভাবই আমায় যুদ্ধ জয়ে উৎসাহিত করেছে। তাঁদের উৎকণ্ঠিত হবার প্রয়োজন নেই ; যদি

মহম্মদ ঘোরী কিছুদিন সময় ভিক্ষা করেছে ; এতো আমাদের পক্ষে ভালই। কিছুদিন সময় পেলে আমরা আরও সমর উপকরণ সংগ্রহ করতে পারব।

সমর। তা সত্য !

( সৈনিকের প্রবেশ )

সৈনিক। যুবরাজ

গোবিন্দ। কি সংবাদ ?

সৈনিক। দিল্লীর শশানে মশানে যে ডাকিনী ঘুরে বেড়ায় সে এই যুদ্ধ ক্ষেত্রে এসেছে !

গোবিন্দ। এখানেও এসেছে ! তারপর ?

সৈনিক। আমাদের শিবিরের চারদিকে ঘুরে বেড়াচ্ছে .. আর বলছে এবার শনিগ্রহ তোদের প্রতি বিরূপ—তোরা এবার ধ্বংস হয়ে যাবি।

গোবিন্দ। বটে ! কিন্তু তাকে কেউ বাধা দিচ্ছে না ?

সৈনিক। বাধা নয় যুবরাজ, তাকে সবাই ভয়ে প্রণাম করছে। তার কথা শুনে সবার মন হতাশায় ভেঙ্গে পড়েছে। আমরা—আমরা গ্রহ শাস্তির জন্তু আজ রাতে দক্ষিণা কালীর পূজা করতে চাই।

গোবিন্দ। দক্ষিণা কালীর পূজা ! মহারাজকে বলেছ ?

সৈনিক। মহারাজ সম্মতি দিয়েছেন ! আর আপনাকে জানাতে বলেছেন।

গোবি। বেশ, তোমরা যাও, পূজার আয়োজন করগে, আমি নিজে গিয়ে সব ব্যবস্থা করে দিচ্ছি। ( সৈনিকের প্রস্থান )

তাইতো, চতুর্দিকে এ কি হুলস্থল ! ডাকিনী সৈনিকদের মনোবল ভেঙ্গে দিচ্ছে। আর ওদিকে মহাদেবী সংযুক্তা দেবীও দুঃস্বপ্ন দেখে ছুটে এসেছেন দিল্লী হতে এই তরায়ণে—

সমর। সংযুক্তা দেবী ! এখানে ?

গোবিন্দ । হাঁ, আমরা যুদ্ধ যাত্রার পরমুহূর্তেই তারা গড়ের অধিষ্ঠাত্রী দেবী  
তাকে কী প্রত্যাদেশ জানিয়েছেন । মায়ের সেই প্রত্যাদেশ শুনে  
মহারানী দিল্লী থেকে চলে এসেছেন । ঐ যে, ঐ যে মহারাজ  
মহারানীকে নিয়ে এই মন্দিরে প্রণাম করতে আসছেন । আনুন্  
রাজর্ষি, শিবিরে সৈনিকরা অপেক্ষা করছে—আমরা তাদের পূজার  
ব্যবস্থা করে দিই গে ! ( উভয়ের প্রস্থান )

( অপর দিক হইতে পৃথ্বীরাজ ও সংযুক্তার প্রবেশ )

পৃথ্বী । ওই...ওই দেখ দেবী, তারা গড়ে আমরা যে বিগ্রহের অর্চনা করি  
ঠিক সেই মাতৃমূর্তির সন্ধান পেয়েছি সরস্বতী তীরে এই বিজন অরণ্যে ।  
সংযুক্তা । আমি জানতুম এখানে দেখা পাব । আমি ঐ প্রত্যাদেশই  
পেয়েছিলুম ।

পৃথ্বী । ঐ প্রত্যাদেশ ?

সংযুক্তা । হাঁ, আপনারা যুদ্ধ যাত্রা করলেন । পরমুহূর্তে স্বকর্ণে যেন  
স্পষ্ট শুনলুম, দেবী আমায় বলছেন, “চৌহান কুলের বিজয়লক্ষ্মী আমি,  
কিন্তু সেতো আমার আশীর্বাদ নিয়ে গেলো না । তুই ছুটে যা !  
সরস্বতী তীরে ভাঙ্গা মন্দিরে আমার দেখা পাবি, তাকে বলবি, সেই  
মন্দিরে এসে আমার আশীর্বাদ নিয়ে যেতে ।”

পৃথ্বী । কি বিচিত্র ! কিন্তু আমি ভাবছি দেবী তোমায় এ স্বপ্ন দিলেন  
কেন ? তারা গড়ের অধিষ্ঠাত্রী দেবীর আশীষ নির্মাল্য না লয়ে  
আমি তো জীবনে কোনো দিনই যুদ্ধ যাত্রা করি নি ! এবারও যুদ্ধ  
যাত্রার পূর্বে পুরোহিত শঙ্কর মিশ্র আজমীর হতে স্বয়ং নিয়ে  
এসেছিলেন মায়ের আশীষ নির্মাল্য ।

সংযুক্তা । আমিও দেখেছি মহারাজ, সেই নির্মাল্য উষ্ণীষে ধারণ করে  
আপনি যুদ্ধ যাত্রা করলেন । কিন্তু তবু—তবু মা আমায় ঐ

দেখালেন। তাই পুরোহিত শঙ্কর মিশ্রকে সঙ্গে নিয়ে এখানে এসেছি—আবার মায়ের পূজা দিতে।

( শঙ্কর মিশ্রের প্রবেশ )

শঙ্কর। মা—

সংযুক্তা। আনুন পুরোহিত, মায়ের অর্চনা করুন।

শঙ্কর। হাঁ অর্চনা করব। পাগলী মা আমার তারা গড় হতে ছুটে এসেছেন এখানে তাঁর সন্তানদের আশীর্বাদ করতে! দেখ মা, ঠিক সেই মূর্তি...সেই আমার তারাগড়ের...( হঠাৎ মূর্তির দিকে চাহিয়া শিহরিয়া উঠিলেন ) অ্যা—কে! কে! কে তুমি—তুমি কেন! তুমি কেন! মা কোথায় গেল! মা কোথায় গেল!

পৃথ্বী। পুরোহিত, পুরোহিত, এ আপনি কি বলছেন—ঐ তো মা—

শঙ্কর। না—না—মা নয়...ডাকিনী...সেই ডাকিনী...

পৃথ্বী। ডাকিনী...

শঙ্কর। হাঁ সেই...যে আমার হাত থেকে মায়ের নির্মাণ্য কেড়ে নিয়েছিল।

সংযুক্তা। মায়ের নির্মাণ্য কেড়ে নিয়েছিল, কোথায়?

শঙ্কর। আজমীরের পথে। মহারাজকে নির্মাণ্য দিতে আসছিলুম, সামনে দাঁড়াল ত্রিশূল করে ভয়ঙ্করী ডাকিনী। সে নির্মাণ্য কেড়ে নিল, পরিবর্তে কি সব ফুল পাতা আমার হাতে তুলে দিল। বলল, যা, পৃথ্বীরাজকে এই দিয়ে আয়। বলবি, এই নির্মাণ্য। সাবধান, যদি তাকে কোনো কথা জানাস...এই ত্রিশূল তোর বুকে বিঁধিয়ে দেব।

সংযুক্তা। আপনি...আপনি...তবে মহারাজকে মায়ের নির্মাণ্য দেননি?

শঙ্কর। না, ডাকিনীর দেওয়া সেই ফুলই দিয়েছিলুম। সে বুঝি আমার মন্ত্রমুগ্ধ করেছিল। তার আদেশ অমান্য করি সে শক্তি আমার ছিল না।

সংযুক্তা । কি সর্কনাশ আপনি করেছেন পুরোহিত, কি সর্কনাশ  
করেছেন ! প্রভু, কি উপায় হবে এখন ?

পৃথ্বী । অধীর হয়ো না, ভয় নেই দেবী ! যা হবার হয়ে গেছে, আমুন  
পুরোহিত, মায়ের অর্চনা করুন ।

শঙ্কর । অর্চনা ! আমি পারবনা মহারাজ—

পৃথ্বী । পুরোহিত !

শঙ্কর । ঐ ঐ দেখুন, মাকে আড়াল করে আবার দাঁড়িয়েছে ঐ সেই  
ডাকিনী, ঐ তার উগ্ৰত ত্রিশূল !

পৃথ্বী । এ কি বিভীষিকা আপনার, কোথায় ডাকিনী !

শঙ্কর । ঐ—ঐ যে আমার বধ করবে বলছে ! পূজা করতে গেলে আমার  
বুক চিরে রক্ত খাবে বলছে ! কি বিভৎস মূর্তি ! চোখে ধক্ ধক্ করে  
আগুন জ্বলছে—আমার পুড়িয়ে মারবে ! না-না, মেরো না,  
মেরো না ! আমি পূজা করব না—আমি পূজা করতে পারবো না ।  
আমি পালাই.. আমি পালাই— (প্রস্থান)

সংযুক্তা । পুরোহিত—পুরোহিত ! চলে গেলেন—পূজা তবে হল না,  
মায়ের নির্মাণ্য তবে পাব না !

পৃথ্বী । সংযুক্তা !

সংযুক্তা । এ কি দৈবের বিধান প্রভু ! বিজয়লক্ষ্মী নিজে এসে দেখা  
দিয়েছিলেন এই মন্দিরে । বরমালা দেবার জন্ত হাত 'বাড়িয়ে বসে  
রইলেন...তবু সে ফুল, সে আশীষ আমরা গ্রহণ করতে পারলুম না !

পৃথ্বী । অধীর হোয়ো না দেবি,

নিশ্চিত লভেছি মোরা মায়ের আশীষ !

নহে, সরস্বতী তীরে এই বিজন কাননে

কোথা হতে অকস্মাৎ, কি কারণ হল এই মাতৃ আবির্ভাব !

ব্রাহ্মণ হেরিল যারে ডাকিনীর বেশে,

মোদের নয়ন অগ্রে, দেখলো কল্যাণি,

আবির্ভূতা তিনি ওই...

শ্রামাঙ্গিনী, সুচারু হাসিনী,

বরাভয়করা দিব্য মাতৃমূর্তি লয়ে ।

পিশাচী আতঙ্কে আজি উন্মাদ ব্রাহ্মণ,

উন্মত্ততা বশে করিল না মাতৃপূজা,

নাহি দিল নিৰ্ম্মালায় মায়ের,

তার পাপ কি কারণ মোদের স্পর্শিবে !

মোরা ত জ্ঞানতঃ সতি,

করি নাই মাতৃ পদে কোনো অপরাধ !

সংযুক্তা । সত্য সত্য প্রভু, আমাদের কিবা অপরাধ !

তবে কেন রুষ্টা হবে মাতা !

পৃথী । নহে রুষ্টা, সুপ্রসন্না তিনি ।

প্রমাণ তাহার যুদ্ধ ক্ষেত্রে মাতৃ দরশন !

প্রমাণ তাহার তুর্কী সনে সন্ধির স্থাপন !

সংযুক্তা । সন্ধির স্থাপন !

পৃথী । অতর্কিতে করেছিল সমর ঘোষণা !

বাধা দিতে তাহাদের এই তরায়ণে

এত ক্রত এসেছি আমরা—

অর্ধেক সৈনিক আর অশ্বহস্তী, আয়ুধ কুপাণ

এখনো সমর ক্ষেত্রে পারিনি আনিতে !

একটি দিবস মাত্র লভিলে সময়

সর্ব আয়োজন মোর সুসম্পূর্ণ হবে,

একটি দিবস মাত্র লভিলে সময়

তুর্কীর সমস্ত সৈন্ত ডুবাইব সরস্বতী জলে ।

অস্তুর কামনা মোর মাতা বুঝি করিলা শ্রবণ,  
তাই নিজে যেচে মহম্মদ ঘোরী  
করিল সন্ধির ভিক্ষা কিছুদিন তরে ?

সংযুক্তা । সত্য ! সত্য মহারাজ !

এখন হবে না যুদ্ধ কিছু দিন তরে !  
নিশ্চিত...নিশ্চিত আমি ।

পৃথ্বী । নিশ্চিত্তে ফিরিয়া যাও রাজধানী মাঝে !

কত মাতা, কত জায়া পতিপুত্রে পাঠায়ে সমরে  
উৎকর্ষায় গৃহে বসে

কখন ফিরিবে তারা জয় মাল্য লয়ে—তারি তরে  
প্রতি পল করিছে গণনা ।

সুকল্যাণি, তাদের সাহসনা দিও,

আশ্বাস দানিও । মোর তরে চিন্তা করিও না,

সুরক্ষিত জেনো আমি মাতৃ কৃপা অক্ষয় কবচে ।

সংযুক্তা । তাই হবে প্রভু,

( সংযুক্তা দেবীকে প্রণাম করিলেন, পরে পৃথ্বীরাজকে প্রণাম করিলেন )

পৃথ্বী । একি প্রিয়তমে, কাঁদিতেছ তুমি...

সংযুক্তা । না...না প্রভু,

পৃথ্বী । এই যে এই যে সতি,

বিন্দু বিন্দু তপ্ত অশ্রু

পড়িতেছে চরণে আমার !

সংযুক্তা...সংযুক্তা...

সংযুক্তা । কাঁদিতে চাহি না প্রভু,

তবু কেন আসে জল অবাধ্য নয়নে

বলিতে পারি না ।

পৃথ্বী ।

সংযুক্তা—

সংযুক্তা ।

বিদায়ের কালে এক কথা বলিব তোমারে ।  
 অস্তুর বেঁধেছি আমি তবু আঁখি'ঝরে,  
 তাই প্রভু, করি নিবেদন—  
 এ জীবনে পুণরায় আর যদি দোহাকার  
 দখা নাহি হয়—দেখা হবে আমাদের  
 জ্যোতিষ্ক মণ্ডল মাঝে  
 দূর সূর্য্য লোকে ।

( প্রস্থান )

পৃথ্বী ।

দেখা হবে আমাদের  
 জ্যোতিষ্ক মণ্ডল মাঝে দূর সূর্য্য লোকে !  
 সুখে দুঃখে আনন্দে বিষাদে  
 চিরস্থির, চির অচঞ্চল,  
 সহিষ্ণুতা প্রতিমূর্ত্তি সংযুক্তা আমার,  
 তার আঁখি কোণে তবু ঝরিতেছে জল ?  
 কেন...কেন এ বেদনা ?

তবে কি...তবে কি যুদ্ধে—

( মন্দিরে বসিলেন )

মাতা, বিশেষ্বরী জননী আমার—

নীরব থোকো না মাগো,

এ বিশ্বে সতত

প্রতি মাতা, প্রতি ভগ্নী, প্রতি জায়া মাঝে

নিজে তুমি মহামায়া অংশরূপে করিছ বিরাজ !

সত্য যদি শাস্ত্রের বচন—বলগো জননী মোরে,

সংযুক্তার আঁখি ঝরা তপ্ত অশ্রুজল—সে কি মাতা—

একি ! একি দেখি ! শীলাময়ী মাতৃগণ্ড পরে

মুক্তা বিন্দু সম ওকি করে টলমল !  
 ওই ওই যে বহিছে অশ্রু ধারায় ধারায়  
 কুম্ভশিলা বক্ষে যথা রজত জাহ্নবী !  
 কেন কেন মাতা, কাঁদিতেছ তুমি ?  
 আমার জীবন চাহ ? তার তরে কেন আঁধি জল !  
 তুমি দেছ, তুমি লবে, তার তরে অশ্রু কেন মাতা !  
 না না ..কেঁদনা পাষাণী,  
 শেষ অর্থ দিতে দাও চরণে তোমার—  
 ঔ প্রত্যালীচ পদাং ঘোরাং মুণ্ডমালা বিভূষিতাম্ ।  
 খৰ্কাং লম্বোদরীং ভীমাং ব্যাঘ্র চন্দ্ৰা বৃতাং কটৌ  
 নব যৌবন সম্পন্নং পঞ্চ মুদ্রা বিভূষিতাম্ ।  
 চতুর্ভুজাং লোলজিহ্বাং মগ্ধভীমাং বরপ্রদাম্ ।  
 খড়্গা কৰ্ত্ত সমায়ুক্ত-সব্যেতর ভুজদ্বয়াম্ ।  
 রুপাণোং পল-সংযুক্ত-সব্যাপানি-যুগাঙ্ঘিতাম্ ।  
 পেন্দ্রোঐগ্রক জটাং ধ্যায়ে-শ্মোলা বক্ষোভ্য ভূষিতাম্ ।  
 বালার্ক মণ্ডলাকার-লোচন ত্রয় ভূষিতাম্ ।  
 অলচ্চিতামধ্য গতাং ঘোর দংষ্ট্রাং করালিনীম্ ।  
 স্বাবেশ স্মের ধদনাং স্ত্র্যালঙ্কার-বিভূষিতাম্ ।  
 বিশ্ব ব্যাপক-তোয়ান্তঃ শ্বেত পদ্মোপরিস্থিতাম্ ।  
 ( পুষ্প দিবেন...ঠিক এমন সময়ে নেপথ্যে কোলাহল )  
 ও কি !

( গোবিন্দের প্রবেশ )

গোবিন্দ । সর্বনাশ মহারাজ !  
 অতর্কিতে আমাদের আক্রমণ করিয়াছে  
 মহম্মদ ঘোরী—

পৃথ্বী। সে কি !

গোবিন্দ। সৈন্যগণ অস্ত্র রাখি শিবির মাঝারে  
কেহ নিদ্রাগত, কেহ শাস্ত্র পাঠরত...  
কেহবা পূজিছে বসি দক্ষিণা কালিকা,  
হেনকালে নৈশ অন্ধকারে  
পশ্চাৎ হইতে শত্রু ভীম বেগে  
আক্রমণ করিল সহসা,  
সেনাগণ হতবাক মুক্জড় প্রায়  
অস্ত্র ধরিবারও বুঝি নাহি অবসর।

পৃথ্বী। বিশ্বাস ঘাতক .. বিশ্বাস ঘাতক তুর্কী,  
সন্ধিহলে হেন প্রতারণা ? সম্মুখ সমর ভয়ে  
আতঙ্কিত হয়ে, নৈশ অন্ধকার মাঝে তরুর সমান  
আক্রমণ—অস্ত্রহীন স্তম্ভ জেনেরে !  
বিশ্বাসঘাতক তুর্কী, নীচ প্রতারণক !  
না, তুর্কীর কি দোষ,  
স্বদেশের সর্বনাশ করিতে সাধন,  
বিধবার বেশ দিতে আপন কঙ্গারে  
এখনো বাঁচিয়া আছে যেথা জয়চাঁদ  
সে দেশের এই পরিণাম—

গোবিন্দ। দাদা—দাদা—

পৃথ্বী। চলো ভাই, মুহূর্ত্ত বিলম্ব নয়।  
অস্ত্র করে ঝাঁপ দিব শত্রু সৈন্য মাঝে।  
তুর্কীরে বোঝাব আজ অন্তরে অন্তরে  
এ ভারত নহে শুধু দেশভ্রোহী জয়চাঁদ জন্মভূমি,

লক্ষ অরাতির শিরে গোপুয়া খেলিতে  
 গোবিন্দ জনমে হেথা, জন্মে পৃথ্বীরাজ ।  
 গোবিন্দ । দাদা—দাদা, অসমাপ্ত পূজা—মাতার অঞ্জলি বাকি—  
 পৃথ্বী । গোবিন্দ ! পুষ্পের অঞ্জলি নয়,  
 বুঝিছ না ভাই, মাতা আজ চাহিছেন  
 রক্ত সিক্ত আত্মার অঞ্জলি ॥

### তৃতীয় দৃশ্য

দিল্লী প্রসাদ কক্ষ

( চাঁদবরদাইয়ের গীত )

কথা কও. কথা কও, নীরব থেকে না আর ।

আঁখি কোণে অক্ষরপে ঝরে কেন আঁখিধার ।

ধুমুসার নীল জলে পড়েছে বিবাদ ছায়া

সকরণ বেহুতানে বুরিতেছে কত মায়া ।

খসিয়া ফিরিছে বধ বনাস্তে ধেন কার হাহাকার ॥

মলয়বতী । সংযুক্তা, মা আমার, কথা শোন—

সংযুক্তা । আমায় অনুরোধ করোনা মা, তুমি কণোজে ফিরে যাও ।

মলয়বতী । যাবো, কিন্তু . তোর পিতা ? তিনি যে পাগলের মত ঘুরে  
 বেড়াচ্ছেন । রাত্রে দুঃস্বপ্নে তাকে দেখে কেঁদে ওঠেন, আহার নেই,  
 নিদ্রা নেই, অনুতাপের তুষানলে জলে পুড়ে যাচ্ছেন ।

সংযুক্তা । অনুতাপ ? আমার পিতার অনুতাপ ?

মলয়বতী । সত্য বলছি মা, তিনি মহাপাপ করেছেন—তুর্কীর সঙ্গে সন্ধি  
 করে তাদের হস্তী দিয়ে সাহায্য করেছেন । কিন্তু বুদ্ধ আরম্ভ হবার

সঙ্গে সঙ্গেই বুঝতে পেরেছেন—যে এবার ভারতের স্বাধীনতা বিপন্ন।  
এ দাবানল শুধু দিল্লীকেই গ্রাস করবে না, সমস্ত ভারতবর্ষকে পুড়িয়ে  
ছাই করে দেবে।

সংযুক্তা। মা—

মায়াবতী। বিশেষ করে তোর কথা মনে করে মা...তোর কথা মনে  
করে.. ভেবে দেখ, কি দারুণ অভিমানে তিনি তোকে ত্যাগ করে-  
ছিলেন! তবু তোর প্রতি তাঁর ভালবাসা...সে তো এতটুকু নিঃশেষ হয়  
নি। একদিকে অভিমান...এক দিকে ভালবাসা দুই মিলে আজ তাঁকে  
পাগল করে তুলেছে। সেই অমৃতপ্ত, সেই উদ্ভাস্ত মূর্তি একটিবারও  
দেখলে তুই তাঁকে ক্ষমা না করে পারিবে নে মা—

সংযুক্তা। বোলো না মা,—ওসব কথা বোলো না! আমি তোমাদের  
অভাগিনী কন্যা, তোমাকে শান্তি দিতে পারিনি; পিতাকে শান্তি  
দিতে পারিনি, জীবন ভোব আমি শুধু তোমাদের দগ্ধ করলুম।

মলয়া। থাক মা, এগার বল! তিনি প্রাসাদ দ্বারে অপেক্ষা কচ্ছেন,  
এটাটার তাঁকে এখানে তোর কাছে আসতে দে!

সংযুক্তা। না মা, যে সে হবে না—তোমরা ফিরে যাও—

মলয়া। সংযুক্তা—

সংযুক্তা। আমি পারব না মা, যদি যুদ্ধ জয় করে আমার স্বামী ফিরে  
আসেন, শুধু তখন...তখনই আমার পিতা এ প্রাসাদে আসতে  
পারেন. তার পূর্বে নয়।

মলয়া। কেন নয়?

সংযুক্তা। কেন নয়? স্বদেশের স্বাধীনতা রক্ষার জন্য যে মহাবীর  
রণচামুণ্ডার মন্দিরে আশ্রয় নিতে গেছেন তাঁরই আবাস গৃহের  
পবিত্রতাকে কি অশুচি করব আজ—না থাক, আমি কন্যা, একথা  
আমার বলাও সাজেনা—তোমারও শোনা উচিত নয়।

মলয়া । সংযুক্তা.....

সংযুক্তা । তুমি কণোজে ফিরে যাও মা । আমার ব্রত পালনের অপেক্ষায় আমি বসে আছি—সে ব্রত পালনের পথে তোমরা বাধা হতে এসোনা ।

মলয়া । কি তোর ব্রত !

সংযুক্তা । এখানে বসে যুদ্ধের সংবাদ প্রতিক্ষা করছি । সমস্ত দিন তিনি তুর্কি সৈন্যের সঙ্গে অমিত-বিক্রমে যুদ্ধ করেছেন । শ্রান্ত ক্লান্ত তুর্কীরা যখন পরাজয় মেনে নেবে—ঠিক সেই মুহূর্তে আমারই পিতার প্রদত্ত অগণন হস্তীযুতসহ নব সেনাদল তাঁকে বেঁটন 'করেছে । তার ফলে...তার ফলে হয়তো এতক্ষণে—

( শহেলী বাড়ির প্রবেশ )

শহেলী । এতক্ষণে সব শেষ মহারণী । যে সূর্যের আলোয় ভারত আকাশ আলোকিত হয়েছিল, তাকিয়ে দেখ—সে সূর্য রক্ত-সাগরে ডুবে যাচ্ছে । ভারত আকাশে স্তরে স্তরে জমাট অন্ধকার নেমে আসছে ।

সংযুক্তা । তুমি...তুমি—কে.....

শহেলী । আমি ? রিক্ত, নিঃস্ব, কালনিশিথিনী—সূর্যাস্তের সংবাদ বহন করে এনেছি--

সংযুক্তা । সূর্যাস্তের সংবাদ ! তবে কি...তবে কি আমার স্বামী—

শহেলী । এই নিশিথিনী তাঁকে ঘুম পাড়িয়ে এসেছে । সে ঘুম আর ভাঙবেনা রাণী—সে ঘুম আর ভাঙবেনা.....

সংযুক্তা । নেই—তবে তিনি নেই ?

মলয়া । সংযুক্তা—সংযুক্তা—

সংযুক্তা । না, কিছু নয় । জানিনা তুমি কে—জানিনা তোমার পরিচয়,

যেই হও, আমাকে আমার স্বামীর কাছে নিয়ে চল...আমাকে নিয়ে  
চল...

শহেলী । আমার তো সেখানে যাবার উপায় নেই ।

সংযুক্তা । কেন নেই ।—

শহেলী । না, কাল-রাত্রি কখনো তো সূর্যের মুখ দেখেনা । আমি  
যাই, সংবাদ পৌঁছে দিলুম, কার্য শেষ ..এবার যমুনার কালোজলে  
আমিও ঘুমোইগে !

সংযুক্তা । যমুনায় ?

শাহেলী । ভারতবর্ষকে মরুরাক্ষসী মনে করেছিলুম । তিনি একদিন  
বলেছিলেন, এদেশ শুধু মরুভূমির দেশ নয় ; এখানে মাতৃস্নেহের  
গঙ্গা যমুনা প্রবাহিত হয় । বিশ্বাস করিনি, পরদেশী দাবানলে সব  
পুড়িয়ে শ্মশান করে দিয়েছি । এবার দেখি, যমুনার জল আছে, না  
আগুণের তাপে শুকিয়ে গেছে । ( প্রস্থান )

সংযুক্তা । অপরিচিতা, বলে যাও, তবে তিনি কোথায়—

নেপথ্যে শহেলী । মহাকালশ্মশানে...মহাকালশ্মশানে—

সংযুক্তা । মহাকালশ্মশানে ! তবে কি সেই ডাকিনীর আশ্রয়ে ? আমি  
যাব । তাঁর মৃতদেহ উদ্ধার করব । স্বামী—স্বামী— ( প্রস্থান )

### চতুর্থ দৃশ্য

মহাকাল শ্মশান । রাত্রিকাল ।

মেঘা হাঃ হাঃ হাঃ হাঃ হাঃ ঘুমিয়েছে ..খুব ঘুমিয়েছে । ঘুমন্ত দেহ  
তার টেনে নিয়ে এসেছি, এই মহাকাল শ্মশানে । বিছানা  
সাজিয়েছি, একটু বাদেই তুলে দেব বিছানায় । কিন্তু একা ঘুমবে ?  
সেটা তো এলনা ? এখনো তো এলনা ? কোথায় গেল ! আয়—  
আয়—আয়—

( সংযুক্তার প্রবেশ )

সংযুক্তা । কে—কে তুমি !

মেঘা । এই যে এসেছিস ! এসেছিস ! হাঃ হাঃ হাঃ আয়, ঘুমুবি  
আয়...ঘুমুবি আয় ।

সংযুক্তা । শীত্র বল—কোথায় আমার স্বামী.....

মেঘা । আছে—আছে, দেখবি ? ওই...ওই বালিয়াড়ীর পেছনে যা,  
ওপরে ওঠ, দেখতে পাবি ! মশাল নিয়ে যা—দেখতে পাবি !

( উপরে উঠিল )

দেখেছিস—!

সংযুক্তা । আমি যাব—আমি ওঁর কাছে যাব ।

মেঘা । ভাবনা কি ? এখনি যাবি, দেখছিস না, কত কাঠ দিয়ে সুন্দর  
বিছানা তৈরী করে রেখেছি ! তুই দাঁড়া, বিছানা ছোট হয়ে গেছে ।  
দুজনে ঘুমুবি তো ? আরও বড় বিছানা চাই । আমি আসছি, আরও  
কাঠ দিয়ে দুজনের বিছানা সাজিয়ে দিয়ে আসছি । দাঁড়া—দাঁড়া—  
( মেঘার প্রস্থান, সংযুক্তা তাহাকে অনুসরণ করিতে গেল, জয়টান  
প্রবেশ করিয়া বাধা দিল )

জয় । সংযুক্তা—

সং । কে ?

জয় । আমি ! আমি !

সং । পিতা !—পিতা—!

জয় । সংযুক্তা, আয় পালিয়ে আয়...পালিয়ে আয়—

সং । পালিয়ে যাব ! কেন ?

জয় । ওই ডাকিনী ...ও তোকে খেয়ে ফেলবে । পালিয়ে আয় ।

সং । তুমি যাও পিতা—আমি কোথাও যাবনা ।

জয় । যাবিনে ?

সং । না, চিতা প্রস্তুত আমি আমার স্বামীর সঙ্গে একই চিতায়  
আত্মাহুতি দেব । আমায় বিদায় দাও—( প্রণাম )

জয় । চিতায় আরোহণ করবি । তবে তাই কর—যদি শান্তি পাস—  
তাই কর মা ! কিন্তু না...যাসনি, ওখানে নয়...ওখানে নয়.....

সং । পিতা—

জয় । এই বুকে... এই বুক জুড়ে যে চিতার আগুণ জ্বলচে... এই আগুণে  
জ্বলবি আর.....

সং । সে হয় না পিতা—আমি যাই.....

জয় । সংযুক্তা—( অপলক চক্ষে সংযুক্তার পানে চাহিলেন ; যেন অব্যক্ত  
যাতনায় অবশ হইয়া গেলেন )

সং । পিতা ! পিতা !

সং । না, আর বিলম্ব নয় । এ আমি চোখে দেখতে পারি না ।  
যাবার বেলায় দুঃখ শুধু এই...যে তোমায় এ অবস্থায় ফেলে গেলুম ।  
সাস্তুনা আমার এই...যে যাবার আগে দেখে গেলুম কৃতকর্মের তীব্র  
অনুশোচনা তোমায় পাগল করে দিয়েছে । ( প্রস্থান )

জয় । চলে গেল—হাঁ যাবেই তো আমি যে দেবীর বোধন লগ্নে বিজয়া  
দশমীর আয়োজন করেছি । যমুনার জলে সোণার প্রতিমা ভাসাতে  
এসেছি । ডুবে গেল কি ? প্রতিমা ডুবেল কি ! না-না-আমি  
ডুবতে দেবনা—দেবনা—সংযুক্তা, সংযুক্তা—

( মেঘার প্রবেশ )

মেঘা । হাঃ হাঃ হাঃ হাঃ—

জয় । কে তুই ! সরে যা...সরে যা রাক্ষসী—

মেঘা । রাক্ষসী ! পুত্র হত্যার প্রতিশোধ নিয়েছি তাই আমার বলছ  
রাক্ষসী । আর তুমি ? সোনার গৌরীর মত মেয়ে, মহাদেবের  
মত জামাইকে যে খায় তাকে কি বলে জয়চাঁদ ? ( জয়চাঁদ মাথা নত  
করিল )

মাথা নামাচ্ছ ? তোমারও চোখে ভল আসছে নাকি ? হা হা হা !  
ওই যে...ওই যে চিতা জলে উঠেছে—দেখ, কি সুন্দর আগুণের  
শিখা । ঐ আগুণ দিল্লীতে জ্বলল, এবার তোমার কণোজ জ্বলবে,  
তারপর জম্মু, কাশ্মীর, অঙ্গ, বঙ্গ, কলিঙ্গ, সমস্ত ভারতবর্ষ দাউ দাউ  
করে জলে উঠবে । জলে ওঠ...চিতা জলে ওঠ— !





